


NZAMBI ME KUBIKA

MWANA-DIMEME

 Beto tanga na—na Buku ya Santu Marc, Mu banza ti mu zola, mu me soola na kutanga mwa ntangu fyoti mpe kuzonzila, mpe nzila ya 46 ya—ya kapu 10. Beto telama na buzitu ya Ndinga, na yina beto ke tanga. Ndinga kele Nzambi. Beto nyonso zaba yawu. Na yawu beno ke telama, samu na kusila kukwikama na yinsi, ya kele yina beno fwana sala; beno ke telama samu na kupesa mbote na dalapo ntangu ya ke telama; samu na yinki Ndinga ya Nzambi ve ntangu Yawu ke tangama?

Mpe bawu kwizaka na Jéricho: mpe na yina bawu basikaka na Jéricho na bilandi ya yandi mpe nkonga ya bantu mingi, mpofo Bartimée, mwana ya bakala ya Timée, vwandaka kuna na lweka ya bala-bala ya nene.

Mpe ntangu yandi kuwaka ti ya vwandaka Yesu ya Nazareth, yandi bandaka na kuboka, mpe kutuba, Yesu, nge mwana ya David, wila munu mawa.

Mpe bantu mingi sembaka yandi ti yandi vwanza swi: kasi yandi bokaka na mutindu ya kulutila nene, Nge mwana ya David, wila munu mawa.

Mpe Yesu kangamaka, mpe pesaka lutumu ba bokila yandi. Mpe bawu bokilaka muntu ya kufwa meso, na kutubaka na yandi, Baka ngolo, telama; yandi ke na kubokila nge.

Mpe yandi, na kulosaka kilele ya yandi, vumbukaka, mpe kwizaka na Yesu.

Mpe Yesu vutulaka mpe tubaka na yandi, Yinki nge zola ti mu sala samu na nge? Muntu ya kufwa meso tubaka na yandi, Mfumu, ti mu kuzwa kumona ya munu.

... Yesu tubaka na yandi, Kwenda nzila ya nge; lukwikilu ya nge me belusa nge. Mpe na mbala mosi yandi kuzwaka kumona ya yandi, mpe landaka Yesu na nzila vwandaka lomba.

2 Beto sambila. Mpeve-Santu ya Nene, pesa luzingu na Ndinga yayi samu na beto, na nkokila yayi, na mwa disolo yayi. Mpe bika ti beto mona ti dyambu yayi kuzinga, mpe, na kusalaka mutindu yina, beto baka lukwikilu ti Nzambi ke zinga dyaka, mpe Yandi kele mutindu mosi mazono, bubu yayi, mpe kukonda nsuka. Beto ke lomba yawu na Nkumbu ya Yesu, Mwana ya Yandi ya luzolo, Mvulusi ya beto. Amen.

Beno lenda vwanza.

³ Dilongi ya beto na nkokila yayi kele: Nzambi Me Kubika Mwana-dimeme.

⁴ Mpe ntangu yayi na suka yayi beto kuzwaka ntangu mosi ya nene, na yina beto monaka Yesu kukota na Jéricho. Mpe beto talaka ti ya vwandaka na mwa muntu mosi kuna na nkumbu ya Zachée, yandi—yandi mataka na zulu ya yinti ya sycamore mpe bumbanaka, samu yandi kwikilaka ve ti Yesu vwandaka profete. Kasi kento ya yandi vwandaka kilandi ya Yesu, mpe yandi vwandaka sambila samu na yandi. Mpe ntangu Yesu kwisaka na yisi ya yinti, Yandi telemaka, talaka na zulu mpe bokilaka yandi na nkumbu, mpe tubaka, “Kulumuka, mu ke kwenda na nge na yinzo bubu yayi.” Mpe mu banzaka ti ya ke vwanda kima ya mbote na nkokila yayi, mpe, na yina beto kele awa, ti beto ke landila kaka na Yesu. Beto lombaka Yandi na suka yayi na kukwenda na beto, mpe beto zolaka kukwenda na Yandi, mpe beto landila kaka na Yandi na nzila ya Jéricho.

⁵ Ntangu yayi, na nkokila yayi, disolo ya beto ke zibuka na kisika mosi, na Jéricho dyaka, mpe Yesu kele na yinzo ya Zachée ntangu yayi, ke na kudya ya Yandi—ya Yandi madya. Mpe ya kele kilumbu mosi ya madidi ya Ngonda ya kumi, mpe ya kele kieleka suka-suka ya suka, dyaka, mpe mupepe ke na kukulumuka na mongo. Kuna na Judée, ya ke vwandaka na madidi mingi kuna, na suka-suka ya suka, mingi-mingi na ntangu yina ya mvula.

⁶ Mpe yinsi na ntangu yina, mpe mutindu ya kele kuna na yinsi ntangu yayi, ya kele na milombi mingi. Bawu ke kwenda bisika nyonso na bansongi ya babala-bala mpe ke lomba. Mu . . . Kuna na bayinsi yango dyaka, babala-bala kele ya kufuluka na milombi. Na Inde mpe, oh, na Afrika, mpe bisika mingi, bawu kele dyaka na milombi; bikata, bantu ya makulu-kifu, bampofu, bantu ya makulu ya kufwa. Mpe bantangu yankaka bantu yina lenda ve kusala kima samu na luzingu ya bawu, bawu mosi, bawu ke lomba kaka, mpe ke vwanda kuna bantangu yankaka mpe ke kufwa na nzala.

⁷ Munu, na Inde, mu me tambula kaka na babala-bala, na mwa mbongo yina ba pesaka munu na bantu yayi, mpe mu sobaka yawu katuka ba-dollars na ba-roupie. Mpe na kumekaka na—na kukabula bawu, mbote, ba zolaka kuzwa mikengi samu na kubasisa munu na bala-bala; ba vwandaka kwiza na munu na mbangu. Mpe ya vwandaka na mwa bakento ya mputu ya kulala kuna, bayina vwanda kufwa na nzala. Na mwa babebe, mpe bawu vwanda kufwa na nzala ti mpusu vwanda ya kukangama na mikwa, mpe kuna beno lendaka kumona mwa mikwa ya bayintu ya bawu. Mpe ba vwanda pesa beno ba-bebe yango, na kumeka ti beno baka bawu samu ti bawu kufwa ve. Kana beno baka mosi *yayi*, wapi mutindu samu na mosi *yina*, wapi mutindu samu na mosi *yayi*, wapi mutindu samu na . . . ? Oh, la la, ya kele, beno—beno . . . Kana beno lendaka mona yina beto ke losaka na dizala awa, ya lendaka dikisa na kutala, bantu yina. Beno ke na

kubakula kaka ve mutindu mbote na yinsi yayi beto kele, na yina beno ke mona bantu yankaka ya yinza ke na kufwa na nzala.

⁸ Mpe ya kele ya kifuluka na milombi. Mpe kilumbu yayi, mutindu disolo ya beto ke na kuzibuka, ya vwandaka. . . Beto ke tala ti milombi nyonso yayi vwanda kwiza, ntangu nyonso, na Jericho, na mwelo ya node, yina na kukatuka na Jerusalem. Jéricho vwandaka ve mbanza ya bumvwama. Kasi Jérusalem, kisika ya nene ya kitoko, kisika ya lukumu ya tempelo, mpe—mpe bamvwama nyonso kwendaka na Jérusalem, mpe ya vwandaka mbanza mosi ya kitoko mingi. Mpe bantu yina katukaka kuna vwandaka na kutala bantu ya bumvwama. Mpe bantu ya mumbungu, mpe nyonso yankaka, ntangu ba vwandaka kwiza, na kilumbu, milombi vwandaka na bisika ya bawu; musiku vwandaka ya kusonama ve, bawu zabaka kaka kisika yina mosi na mosi zolaka vwanda ya yandi, samu na kulomba dimpa ya yandi, yina ba ke pesa yandi.

⁹ Mpe bawu zolaka kuma kuna na suka-suka na ntangu bantu ya mumbungu vwandaka kota, samu ti ya lendaka vwanda ti muntu yango zolaka sadisa kaka mulombi mosi na kilumbu, ti vwandaka na pata mosi na poketi ya yandi, ya kupesa, ntete yandi kwenda. Mpe, ya kieleka, na ntangu yina, Rome vwandaka yala na zulu ya Palestine, mpe mbongo vwandaka mbongo ya Rome. Mpe na yina ba vwandaka na mwa pata mosi—mosi, yina bawu zolaka pesa na mulombi ya ntete, mu banza, mpe yina sukisaka yawu samu na kilumbu. Yandi zolaka lenda ve ku—kupesa na konso mulombi. Na yawu yandi yina kutanaka ntete na yandi, kieleka, kuzwaka pata. Na yina ba vwandaka na bisika ya bawu na nganda ya mielo, mpe na ntwala bantu kukota na mbanza, bizieti, mpe nyonso yina. Mpe bawu vwanda vwandaka kuna na mwelo yina ya node, mingi-mingi, samu bizieti vwanda kotila kuna.

¹⁰ Mpe mutindu beto me mona na suka yayi na yina beto ke na kuzonzila, mwini bandaka na kutelama awa, pene ya ngunga yivwa, ya vwandaka na mulombi mosi ya mpofu yina kumaka na kutala na manima ya ntangu.

¹¹ Yandi kuzwaka mpimpa mosi ya yimbi. Yandi vwandaka mpofu. Yandi kumaka mpofu kubanda yandi vwandaka mwana-bakala ya fyoti. Mpe yandi kumaka na manima ya ntangu. Yandi vwandaka ve. . . Yandi vumbukaka na manima ya ntangu, na suka yina, samu ti mpimpa ya muvimba yandi lotaka ti yandi lendaka mona dyaka. Mpe yandi vwanda yenga-yenga na mbeto ya yandi. Mpe—mpe yandi vwanda lenda kumona, yandi banzaka ti yandi lendaka mona, mpe na kuvumbukaka na mawa yayi, ti yandi lendaka ve kumona. Kieleka, ya vwandaka kaka ndosi.

¹² Mpe yandi salaka nzila ya yandi tii na kisika ya yandi. Mpe ntangu yandi kumaka kuna, (ntangu yayi yayi kele disolo ntangu yayi, samu na kukuma na kisika ya munu) ya vwandaka ve

na muntu kuna. Ya vwandaka na kima mosi ya ngitukulu yina kusalamaka. Ya vwandaka na kutala kaka ngunga pene ya yivwa na ndambu to ngunga ya kumi, mpe—mpe ya vwandaka dyaka ve na milombi kuna. Na bambala mingi, muntu nyonso vwandaka na kisika ya bawu. Yandi zabaka ve yina salamaka na mbanza; ya kele yina beto talaka na suka yayi na madya ya beto ya suka, mpe beto zonzilaka yawu. Yesu kotaka na mwelo mpe kotaka na mbanza, mpe—mpe bantu mingi kwendaka na kati kuna na kuzaba yinki nyonso yina vwandaka, mpe milombi mpe. Mpe yandi zabaka yayi ve, samu ti yandi kumaka na manima ya ntangu. Na yawu beto lenda mona yandi mutindu yandi ke banda na kubokila bankumbu ya mutindu na mutindu, mpe ya kele—ya kele ve na muntu kuna. Mutindu ya dyambu ya yandi mosi. Yandi kukiyufulaka, mbote, ya lendaka vwanda bapulusu ya Rome me bingisa bawu na kisika, to kima mosi. Na yawu yandi kuwaka muntu ve, na yawu yandi . . . Ya vwandaka mutindu mwa madidi, mpe yandi vwandaka ya kulwata bitende mpe bilele ya yandi vwandaka kieleka ya kubeba.

¹³ Mpe yandi kwendaka na kubulaka nkawa tii yandi kuzwaka ditadi yina vwandaka na mwini, yina kubwaka na kutala na bibaka ntangu Nzambi bulaka kibaka ya ntama, na bilumbu ya Josué. Yandi vwandaka na zulu ya ditadi yayi, mpe vwandaka meka na kubanza na ndosi yina yandi lotaka na nkokila yina na ntwala, wapi mutindu kieleka ya zolaka vwanda kana kieleka yandi zolaka mona. Kasi, yandi—yandi vwandaka mona ve. Yandi vwandaka mpofo. Mpe yandi bandaka na kubanza na zulu ya bima yayi, mpe dibanza ya yandi vutulaka yandi na bumwana ya yandi.

¹⁴ Beno zaba, mu—mu ke zolaka kusala yawu, kuvwanda mpe kubanza na bima yina me lutaka, bima ya kitoko, ya balunungu mu me mona Mfumu kununga, mpe—mpe bantangu.

¹⁵ Mpe Bartimée, mutindu beto zaba yandi na nkumbu, yandi lotaka na mpimpa yina ti yandi kuzwaka kumona ya yandi, yandi bandaka na kubanza mutindu kieleka ya zolaka vwanda kana kieleka yandi zolaka mona. Yandi banzaka, “Oh, mu kele ya kufwa meso ya me kuma bilumbu mingi, mu zaba ve wapi mutindu mu ke zaba mpe mutindu ya kutambula dyaka.” Na yawu yandi bandaka na kubanza pene ya bamvula mingi na manima, ntangu yandi vwandaka mwana-bakala ya fyoti. Yandi vwanda sakanaka kuna na zulu ya mongo, na lweka, ya kele na simu kisika Jourdain ke kulumukaka; mpe kiwanda kele kuna, ya kele kuna bawu vwanda menisa mbuma. Mpe yandi vwanda zingaka na lweka ya mongo, beto ke tuba. Mpe yandi vwanda bambuka moyo mutindu kitoko ya vwandaka na—na Printemps, na—na kutala bafololo ya fyoti mutindu bawu vwanda kuyela; mpe wapi mutindu yandi zolaka baka mwa ndambu ya diboko ya bawu, mpe kuvwanda mpe kutala mazulu ya bleu ya kitoko mingi.

16 Beno zaba, kimpofu keke kima mosi ya boma. Ntangu mu ke monaka muntu, mpofu, ntima ya munu ke kufwa na mawa samu na yandi. Kasi, dyaka, mu zaba kimpofu mosi yina keke yimbi mingi, ya keke kimpofu ya kimpeve; mutindu Nzambi salaka muntu samu—samu na kutala kimonikisi ya Yandi, mpe bawu lenda ve.

17 Kilumbu mosi, na zoo ya Cincinnati, mu vwanaka kuna, mwana ya munu ya kento na munu kintwadi. Mu keke muntu ke zolaka bima ya zulu, mutindu beno zaba. Mpe mu monaka ti bawu simbaka ngononi mosi mpe—mpe tulaka yandi na kati ya kazye mosi, mawa na ndeke ya mputu yina! Mu kuwaka makelele; mpe mu vwanaka ya kusimba Sarah ya leke na diboko, mpe beto—beto kwendaka kuna na kazye. Mpe kuna ndeke yayi ya nene, ya kufuluka na menga bisika nyonso na kizizi ya yandi, na mapapu nyonso ke na kukatukila yandi. Mu banzaka, “Wapi dyambu ya kiadi!”

18 Yandi me kulumuka. Yandi me vutuka na nsongi mosi ya kazye. Yandi me banda dyaka, mpe yandi yayi ke na kwiza awa, ke na kubulaka mapapu ya yandi, samu—samu na kubula yintu ya yandi na lweka ya—ya kazye, vwanaka bula mapapu ya yandi na zulu mpe na yisi, samu na kubasika na kazye, mpe mapapu vwanaka katuka. Kasi yandi vwanaka ya kusimba. Yandi kubwaka na ntoto mpe lalaka kuna, mpe meso ya yandi balukaka, yandi talaka na zulu mpe monaka mazulu ya bleu kisika yandi butukaka. Yandi keke ndeke ya mazulu, beno zaba. Kasi, beno me mona, mutindu mosi ya kusala ya mayele ya muntu me tula yandi na kati ya kazye.

19 Mu telamaka kuna vwanaka tala yandi. Mu banzaka, “Mu ke pesa nyonso kana mu lendaka sumba yandi. Kana mu lendaka sumba yandi, mu ke yambula yandi, mu ke tuba, ‘Kwenda, ndeke ya mawa, nge ke—nge ke zola yawu. Munu mpe. Kuzwa kimpwanza mpe kwenda na zulu kuna. Nge keke ya zulu kuna. Nge butukaka samu na yawu.’” Mu banzaka, “Ya keke kumona ya kulutula kyadi yina mu me monaka ntete ve.”

20 Mu me nangula Sarah, me simba yandi na diboko ya munu. Mu tubaka, “Cherie, ya keke mosi ya dyambu ya kulutula yimbi yina meso ya nge lenda tala.”

21 Mu telamaka kuna, vwanaka banza. Mu banzaka, “Ve, mu—mu zaba dyambu ya kulutula yimbi na yina. Tala na zulu ya mongo kuna; babakala yayi na mbwata ya byele na diboko ya bawu, bakento ya kulwata bakupe, na dikaya.” Na yina ya kieleka bawu kubutamaka na kuvwanda bana ya babakala mpe bana ya bakento ya Nzambi, mpe kuna bawu keke na kati ya kazye ya disumu yina Satana me tula bawu na kati. Ya keke kyadi, ya mpofu na kimpeve, ya kutula na kati ya kazye; na kutala ya lendaka vwanaka muntu ya dibuundu mosi, yina ke

yimbaka na chorale, kasi dyaka ya kukangama na kazye ya disumu.

²² Mpe mutindu Bartimée vwanda meka na kubanza kuna na ntangu yina yandi vwandaka mwana-bakala ya fyoti, wapi mutindu ti pene ya ngunga zole, na nkokila, mama ya yandi ya kitoko, mwa mama ya Juif zolaka bokila yandi, “Bartimée.” Yandi na kutala vwanda kuwa dyaka ndinga ya mama ya yandi, mutindu yawu vwandaka wakana kuna na myongo, mpe yandi vwanda kwiza na mbangu. Mpe yandi vwanda basika na velandi mpe vwanda baka kiti berceuse ya ntama, mpe vwanda baka yandi na maboko ya yandi. Mpe yandi bambukaka moyo mutindu yandi vwandaka tala meso ya yandi ya kitoko, mpe wapi mutindu ya mama ya kitoko mingi yandi vwandaka na yawu. Mpe mutindu yandi vwanda bondilaka yandi na kulala, samu yandi kuzwa kupema ya yandi ya mpimpa. Mpe mutindu yandi salaka yawu, yandi vwanda tubaka na yandi masolo, masolo ya bantu ya bawu, mpe ya bapofete ya nene mpe ya ngolo ya Nzambi yina vwandaka na kati-kati ya bawu. Mpe mutindu ti yandi vwanda zolaka yawu, yandi vwanda zolaka kuwa yawu.

²³ Ya kele yimbi mingi ti bamama ke tula bana ya bawu na manaka ya muvusu ya television ya Hollywood; na kisika ya kusala kima mutindu mosi, na kutubaka na bawu masolo ya Biblia.

²⁴ Kasi yandi vwandaka mama ya Hébreux ya kieleka, mpe yandi vwanda tubaka na mwana ya fyoti ya bakala masolo. Yandi vwanda tubaka, ke tuba na yandi na yina Nzambi fidisaka Moise ya nene, ya ngolo, ntangu bawu vwandaka bampika kuna na Egypte. Nzambi silaka Tata Abraham ti Yandi ke vulusa bawu. Mpe Yandi monikaka na profete ya nene yina Nzambi telemisaka na kati-kati ya bawu, na nkumbu Moise. Mpe Yandi kwizaka na mutindu ya Dikunzi ya Tiya, mpe fidisaka Moise kuna na Egypte, mpe na bidimbu ya nene, ya ngolo mpe mambu ya ngitukulu ti Yandi basisaka bawu. Mpe wapi mutindu ti na ntoto ya kuyuma, na dimpa to kima ve ya kudya, kasi ba vwandaka tambula na ndonga ya kutumama, mpe Nzambi kulumusaka mampa na yisi ya dizulu.

²⁵ Mpe mu lenda kuwa mwa Bartimée yayi kutuba, “Mama, vingila fyoti. Nzambi fwana kuzwa Bawanzio ya Yandi nyonso na kusalaka kuna, mpe Yandi kele na bafour ya nene nyonso na zulu ya mazulu, mpe Bawanzio vwanda sala ngunga na manima ya ngunga, samu na kukubika dimpa, mpe vwanda nata yawu na . . .”

²⁶ “Ve, cheri, nge kele ntwenia mingi samu na kubakula. Nge me mona, Yehowa fwana sala mutindu yina ve. Yehowa ke na nsatu ya kuvwanda na bafour ve. Yandi kele mvangi. Yandi ke zonga kaka yawu, mpe ya kele mutindu yina.”

27 Na yina yinki beto ke tuba samu na Yesu, ntangu beto monaka Yandi kubaka kima mutindu mosi? Ya fwana vwanda na kima ya santu na yina me tala Yandi. Yandi fwana vwanda singa mosi na Yehowa. Muntu mosi bubu yayi ke meka na kusala Yandi kaka profete, to muntu mutindu bantu nyonso, to muntu ya philosophie, mulongisi ya mboté. Yandi vwandaka kima yankaka ve kasi Nzambi monisamaka na nzutu.

28 Kuna na yina yandi vwanda zonza na yandi mpe kutuba na yandi wapi mutindu ti nsabukulu kusalamaka na ntoto ya kuyuma ya nene, yina vwandaka kaka na manima ya Jourdain kuna, mpe wapi mutindu ti na Printemps, kuna na Ngonda ya yiya, ntangu mvula ya mpembe vwanda kubwa, kuna na Judée, mpe bamaza nyonso ya mongo vwanda kulumuka, mpe Jourdain nyonso vwandaka—vwandaka kaka ya kufuluka na maza, mabulu ya nene na kati ya nzadi. Ya monanaka ti Yehowa vwandaka ntwadisi ya mputu, samu na kunata bantu ya Yandi na ntangu yina ti banzadi vwandaka fuluka, na mutindu ya yawu ya yimbi. Wapi mutindu bawu zolaka vwanda na kiyeka ya kutunga kiamvu mosi na zulu ya yawu? Mpe Josué ya fyoti, to mwa . . . Josué ve.

Kasi Bartimée yayi ya fyoti lendaka tuba, “Mama, wapi mutindu Yandi salaka yawu?”

29 Yandi tubaka, “Cheri, bambuka moyo, Yehowa kele kaka mvangi. Yandi zonzaka kaka, mpe . . .”

30 Nzambi ke zolaka kuzwa bima na . . . ntangu ya kele na kati ya poto-poto, mpe ke lakisa Yandi mosi Nzambi. Kaka na Printemps! Na ntangu na Été, beno lendaka kaka kusabuka Jourdain na malembe nyonso kuna, ya kele na nzila ya kulutila na mbanza. Beto zaba yawu, na nzila ya balangididi yina vwandaka kwenda kuna mpe vwandaka kwiza na yayi. Kasi Nzambi bikaka biwanda nyonso kufuluka na maza, mpe na manima Yandi kwizaka mpe bendaka ngolo ya Yandi ya nene kuna na Zulu mpe salaka nzila ya kuyuma na kati ya yawu. Kuna telamaka matadi na yisi, kisika Josué tubaka na bawu na kuvukisa yawu, mutindu lubambuku na Yehowa, mutindu ti bantu ya bawu vwandaka ya kukeba. Mpe yandi . . .

31 Mosi yankaka yandi—yandi vwandaka zola mingi mboté, vwandaka kento ya Sunamite. Yandi bambukaka moyo na yawu. Mpe mama ya yandi vwandaka tuba na yandi disolo ya Sunamite, mpe ya profete ya nene, Elie, na kilumbu ya yandi, mpe mutindu ti kento yayi vwandaka ya mutindu ya profete yayi. Kasi, yandi vwandaka ve kieleka Israelite. Yandi vwandaka Sunamite.

32 Na yawu yandi kwikilaka ti Elie vwandaka profete, profete ya nene ya Mfumu. Na yawu ntangu . . . Kilumbu mosi yandi tubaka na bakala ya yandi, “Beto tunga yandi mwa kivinga na

lweka ya yinzo ya beto, mpe beto talisa yandi lutondo, samu ti yandi kele—yandi kele muntu ya nene.”

³³ Mpe wapi mutindu kilumbu mosi ntangu Elie na Guéhazi, kisadi ya yandi, kwizaka mpe bawu monaka lutondo yayi nyonso, yandi tubaka na Guéhazi, “Kota kuna mpe—mpe yufula, ‘Yinki beto lenda sala? Mu lenda tuba na ntinu to na mfumu kapitene?’”

³⁴ Yandi tubaka, “Ve, mu ke zinga kaka na kati-kati ya bantu ya munu. Ya kele mbote mingi.”

³⁵ Kasi Guéhazi tubaka, “Yandi kele kisita. Yandi kele kiboba, bakala ya yandi kele kiboba, mpe bawu kele na bana ve.” Mpe yandi tubaka . . .

³⁶ Mpe Élie zolaka mona vision. Yandi tubaka, “Kwenda, tuba na yandi, MUTINDU ME TUBA MFUMU, yandi ke kuzwa mwana ya bakala ya fyoti.” Mpe, na bangonda yivwa, mwana-bakala yayi ya fyoti kwizaka.

³⁷ [Kisika ya mpamba na bande—Mu.] . . . kiboba, yandi vwandaka na tata ya yandi, kuna na kilanga, samu na kubuka bambuma, mpe yandi zolaka vwanda mingi na yisi ya mwini. Yandi landilaka na kudila, “Yintu ya munu! Yintu ya munu!” Mpe tata fidisaka yandi na yinzo. Mama me baka yandi na makoto ya yandi, mpe me bondila yandi, mpe ya lendaka vwanda ti yandi pesaka yandi bankisi nyonso yina yandi lendaka pesa yandi. Mpe mwa mwana yango ya bakala kumaka yimbi mingi tii, na nsuka, pene ya midi, yandi kufwaka.

³⁸ Mpe mutindu mwa mama yina zolaka vwanda ve ya kununga! Na ntangu tata kwizaka, mpe bamfinangani nyonso kwizaka, mpe bawu vwandaka nyonga mpe kuboka na ngolo, mwana ya bakala me kufwa, kasi yandi vwandaka kaka na lukwikilu na profete yayi, profete ya Hebreux; yandi, Muntu ya makanda. Yandi tubaka, “Kubika munu mpunda, mpe—mpe kutelama ve—ve—ve, kasi bika mu kwenda na caverne yina kisika profete yayi ke zingaka, kuna na Mongo Carmel.”

³⁹ Mpe bakala ya yandi tubaka, “Ya kele ve ngonda ya malu-malu to saba, mpe yandi ke vwanda kuna ve.”

Yandi tubaka, “Nyonso ke bonga.”

Yandi tubaka, “Kwenda.”

⁴⁰ Mpe ntangu Elie monaka yandi kukwiza, yandi na Guéhazi basikaka na caverne, mpe talaka, ya kutelama kuna. Mpe yandi kwizaka awa. Yandi tubaka, “Awa ke na kwiza Sunamite, mpe yandi kele na kidi-kidi, kasi Nzambi me sala yawu kinsweki, na ntima ya munu.”

⁴¹ Beno zaba, Nzambi ke tubaka ve na bapofete ya yandi nyonso, kaka yina Yandi zola ti bawu zaba.

42 Na yawu yandi—yandi talaka, mpe yandi tubaka, “Yandi kele. . .” Yandi tubaka, “Kwenda, kutana yandi, mpe tuba, ‘Nge kele mbote? Bakala ya nge kele mbote? Mwana kele mbote?’”

Mpe yayi kele kitini yina mu ke zolaka, mpe.

43 Ntangu Guéhazi kutanaka na yandi, yandi tubaka, “Nge kele mbote? Bakala ya nge kele mbote? Mwana kele mbote?”

44 Yandi tubaka, “Nyonso kele mbote.” Bébé ya kulala ya kufwa, bakala ke na kuboka, maza ya meso vwandaka kubwa na kati ya ntima ya yandi, kasi, “Nyonso kele mbote.” Yandi kwizaka na ntwala ya bakala yina lendaka tuba na yandi mpe kusakumuna yandi, mpe, yandi vwandaka na bébé, ya kieleka Nzambi lendaka talisa samu na yinki Yandi bakaka yandi. “Mfumu me pesa, Mfumu me baka, Nkumbu ya Mfumu kusakumukwa!” Yandi zolaka zaba samu na yinki.

45 Mpe na yina mutindu yandi kwizaka mpe kubwaka na makulu ya Elie, mpe Guéhazi na nswalu telemisaka yandi; yina vwandaka ve ya kulunga samu na mfumu ya yandi. Mpe yandi monisaka yina vwandaka yimbi. Mpe Elie kwendaka kuna mpe vumbulaka mwana-bakala yina ya fyoti, na kutulaka nzutu ya yandi na zulu ya mwana-bakala yayi ya fyoti.

46 Mpe mu zola mpe ti, beno tala lukwikilu ya mama yayi, mpe. Yandi tulaka bébé na zulu ya mbeto yina Elie vwanda lalaka. Mu zola ti beno. . .

47 Mu zola kutendula dibanza ya Paul awa, na mutindu ya munu ya kubanza. Beno zaba, Paul tulaka bamuswale na zulu ya bambevo mpe na bantu ya mpasi, mpe biniti ya balele. Mu ke kwikila ve ti Paul vwandaka ve muntu ya masonuku. Mu banza ti awa kele kisika yina yandi kuzwaka yawu. Beno ke bambuka moyo na kima ya ntete Elie tubaka na—na Guéhazi? “Baka nkawa ya munu mpe kwenda tula yawu na zulu ya bébé yango.” Yandi zabaka ti nyonso yina yandi simbaka vwandaka ya kusakumunwa. Mpe na yawu, beno bambuka moyo, Paul sambilaka ve na zulu ya bamuswale. Ba katulaka kaka yawu na nzutu ya yandi. Yina vwandaka lukwikilu ya bantu.

48 Na yawu, beno me mona, yandi tubaka, “Baka nkawa ya munu mpe (kana muntu pesa nge mbote, kuvutula ve mbote) tula yawu na zulu ya bébé.”

49 Kasi lukwikilu ya kento vwandaka ve na yinti; ya vwandaka na profete. Mpe kento tubaka, “Mu ke bika nge ve tii. . . Ya kieleka mutindu moyo ya nge ke zinga, mu—mu ke bika nge ve.”

50 Na yawu Elie, na kukatukila yandi, zolaka kwenda na yandi. Na yawu yandi kwendaka kuna mpe tulaka nzutu ya yandi na zulu ya mwa bébé yango, ya kufwa, mpe yandi me sala nsia bambala sambwadi mpe me vutukaka na luzingu.

51 Oh, wapi—wapi mutindu ya disolo ya nene ya vwandaka samu na mwana yayi Barti-. . . Bartimée, ntangu yandi

vwandaka mwana-bakala ya fyoti. Mutindu yandi vwanda zolaka mwa disolo yina, samu ti yawu vwandaka mvumbukulu ya mwana ya bakala ya fyoti. Yina vwandaka mosi ya yandi ya luzolo.

⁵² “Kasi yina vwandaka na bilumbu yina me luta,” nganga-Nzambi ke tuba na yandi ntangu yayi. “Kyadi, yina vwandaka na bilumbu ntangu Israel vwandaka na bantu ya nene, ya ngolo; baprofete ya nene, ya ngolo vwandaka tambula na yinsi.” Kasi banganga-Nzambi tubaka, “Beno zaba, Yehowa ke na nsatu ya baprofete dyaka ve.” Kaka banganga-Nzambi ve vwanda tuba yawu. Kasi—kasi bantu na ntangu yina mpe, “Yehowa ke na nsatu ya baprofete dyaka ve. Yandi pesaka beto musiku, mpe beto tungaka dibuundu, tempelo, mpe ya kele nyonso yina beto kele na yawu nsatu.” Mpe ya kele kaka mutindu mosi bawu ke kwikilaka yawu bubu yayi, kasi dyaka Yehowa kele kaka Yehowa mpe Yandi lenda ve kusoba nzila ya Yandi; Yandi kele Nzambi, mpe ke sobaka ve. Ntangu yayi bawu kwikilaka ti ya kele—ya kele nyonso yina bawu—bawu vwandaka na nsatu.

⁵³ Mpe na yina na ntangu yandi vwandaka ya kuvwanda kuna na kilumbu yayi, mutindu ya vwandaka, na kubanzaka na yawu, mpe meso ya yandi ya kufwa me baluka na mwini ya ngolo; na mbala mosi, yandi kuwaka makelele ya mwa makulu ya mulet ke kulumuka na nzila ya matadi, na kukulumukaka na Jérusalem, na ba-pavé, na kukotaka. Mutindu... mpe yandi kuwaka na bukebi nyonso, mpe ya vwandaka na muntu na mapapa na makulu vwanda kima na ntwala ya mwa mulet yango. Mpe yandi zabaka ti ya fwana vwanda muntu ya bimvwama, samu ti nzyetolo ya yandi vwandaka na nzila ya mulet mpe ti yandi vwandaka na kisadi samu na kutwadisa mulet.

⁵⁴ Na yawu yandi telamaka, na kuzabaka ti yandi ke kuzwa mwa mbongo samu—samu na kuzinga. Na yawu yandi telamaka mpe lwataka robe ya yandi, mpe mwa robe ya kupasuka, mpe me basika na bala-bala na kukimaka, mpe yandi tubaka, “Mu ke zola kuzwa kima ya kukabula. Mu vwandaka lutale na suka yayi. Nge lenda kabula munu kima? Mu kele mpofo.”

⁵⁵ Mpe beto ke kuwa ndinga ya ngolo mingi kukwiza, “Katuka na nzila, mulombi! Mu kele kisadi ya Yehowa. Mu kele nganga-Nzambi. Mu ke kulumuka na Jérusalem, ba me tinda munu na kimvuka, na kusukisa lukutakanu ya kubeluka ya nzutu yina ke vwanda awa na suka yayi na—na Jéricho. Mu fwana kukutana na bampangi awa mpe kumona ti kima yina kusalama ve, samu ya kuma na bantu. Ya kele na profete ya luvunu na yinsi, nge me mona. Beto kele. . . beto me kuwa ti Yandi kele na Jéricho na suka yayi, mpe mu kele na nzila ya munu. Katuka na nzila ya munu!” Nganga-Nzambi. “Mpe, mbote mingi, kisadi ya munu, beto landila nzila.” Mpe mwa mulet yango me vutuka na kutambula dyaka.

56 Na manima mulombi vutukaka na kusosaka nzila ya yandi na nkawa tii yandi kuzwaka ditadi, yandi vwandaka. Yandi landilaka na kubanza, mpe ntangu yandi bandaka na kubanza, “Kuna na mwa nzila yina kisika mu vwandaka ya kutelama; ntama mingi ve, baprofete ya nene mpe ya ngolo, Elie na Elisée, lutaka, diboko na diboko, na kutambulaka na bala-bala yina mosi, diboko na diboko, na kukwendaka na Jourdain. Mpe Jourdain zolaka zibuka dyaka. Mpe na lweka yankaka, samu na profete yayi ya kiboba ya kulemba, Elie, ya vwandaka na kipusu ya Tiya mpe bampunda ya Tiya, yina ba kangaka na divala mosi kuna na zulu, samu na kunata yandi na yinzo. Mpe yandi zolaka mona, ntwenya Elie yayi. . . Élisée vwandaka tala na manima mpe kumona ministele na ntwala ya yandi, yina vwandaka ya kutula na ntwala ya yandi. Yandi zolaka kanga meso ya yandi na profete yayi.”

57 Mpe mu lendaka banza Bartimée kutuba, “Kana mu lendaka kaka kuzinga na kilumbu yina, mpe vwandaka ya kuvwanda awa, Mu zolaka kwenda mbangu na baprofete yina, kubwa na zulu ya kizizi ya munu, mpe kutuba, ‘Oh, profete ya Nzambi! Sambila samu na munu, mpe Yehowa ke vutula munu kumona ya munu.’ Kasi nganga-Nzambi tubaka, ‘Yina kele, ya kele dyaka ve na kima mutindu yina. Beto kele na yawu ve. Yehowa ke belusaka dyaka ve, na nzila ya ngolo ya Yandi. Beto kele na badokotolo mpe nyonso yina ke salaka yawu. Mpe beto kele dyaka ve na nsatu ya yawu, na yawu Yehowa ke belusaka ve. Ya vwandaka ya kilumbu yina lutaka. Beto ke zitisaka kaka musiku. Mpe beto ke bela, mpe ke kufwa mpe ke kwenda na Mazulu, mpe kaka yina. Ya kele nyonso yina beto kele na yawu nsatu.’”

58 Na yina mutindu yandi bandaka na kubanza, kuna yandi bambukaka moyo. Kuluta ve bankama tanu ya bametele na kisika yina yandi vwandaka ya kuvwanda; na manima Israel kusabukaka mpe vwandaka, mpe ti nyonso vwandaka ya kutula na kisika, batenta nyonso na bisika nyonso ya yawu, na kulingilaka bantumunu ya kutambula na Jéricho. . . Mpe na kutala ditadi ya kieleka yina yandi vwandaka ya kuvwanda na zulu ya vwandaka mosi yina Yehowa bulaka na zulu ya—ya bibaka.

59 Mpe yandi tubaka, “Beno banza kaka na yawu! Ntama mingi ve, kinwani mosi ya ngolo, Josué, kisadi ya nene ya Nzambi, ya ngolo, sabukaka maza, na Printemps, vwandisaka batenta ya yandi, kaka na ntwala ya mbeni. Kilumbu mosi, na yina yandi vwandaka longuka mutindu ya yandi ya kusala samu na kunwanisa Jéricho, nkokila mosi na yina yandi vwandaka tambula na ngaanda, to na suka mosi, na kutalaka myelo bisika nyonso, mpe wapi mutindu ya vwandaka nene. Bawu vwanda sala bansaka ya mbangu ya bipusu na zulu ya yawu, na bampunda mingi, mosi na mosi na lweka yankaka, na ziunga ya mwelo. Wapi mutindu Josué vwandaka tala. Yandi talaka ya

kutelema kuna na kibaka, mpe kuna vwandaka ya kutelama Bakala mosi na mbele ya Yandi ya kubenda. Josué bendaka mbele ya yandi mpe kwendaka kutana Yandi. Josué bokaka, yandi tubaka, ‘Nge kele na beto to Nge kele mosi ya bambeni ya beto?’ Yandi tubaka, ‘Ve, mu kele Kapitene ya basoda ya Mfumu.’ Josué ya ngolo losaka mbele ya yandi na ntoto, mpe katulaka yimpu ya yandi mpe kubwaka na makulu ya Yandi.”

⁶⁰ Mpofo Bartimée banzaka, “Ya vwandaka ve bametele nkama tanu na kisika yina mu kele ya kuvwanda kaka ntangu yayi. Kisika makesa ya ngolo ya Mfumu, Kapitene ya makesa, mpe Josué fukamaka na makulu ya Yandi. Oh, kana mu vwandaka kaka kuna na kati ya batenta yango, mpofo kuna, Mu zolaka yufula Kapitene ya ngolo ya makesa ya Mfumu kana Yandi zolaka pesa munu kumona ya munu, mpe Yandi zolaka sala yawu.” Fyoti yandi zabaka ti Kapitene yango mosi vwandaka fyoti ntama na bankama tanu ya bametele na yandi.

⁶¹ Ya kele yina beto ke salaka na kukondwa, na nkokila yayi. Beto ke mekaka na kutula nkembo nyonso, mpe Klisto, ntama na manima na nsungi yankaka. Biblia ke tuba, “Yandi kele mutindu mosi mazono, bubu yayi, mpe kukonda nsuka.” Yandi kele kaka awa na kati ya kivinga yayi, na nkokila yayi, mutindu kaka Yandi vwandaka tambula na Galilée to na Jérusalem.

⁶² Kapitene yina ya nene yina katukaka na yinzo ya Zachée, mpe bantu vwandaka—vwandaka vingila Yandi kuna na ngaanda.

⁶³ Na mwa baminuti fyoti, yandi me kuwa makelele, mpe makelele ya bandinga ya kuvukana.

⁶⁴ Mosi ke tuba, “Hosanna na Profete yina me kwiza na Nkumbu ya Mfumu! Lusakumunu na Profete ya Galilée, Kisadi ya Yehowa!”

⁶⁵ Bayankaka vwandaka tuba, “Ntama ya beto Muntu ya mutindu yayi! Beto ke vwanda ve na mosi ya Yayi awa na mbanza yayi.” Mpe na yina bawu vwandaka kwenda na ntwala, mpe bayankaka ya bawu vwandaka losila Yandi bambuma ya kuyela mingi, na yina Yandi vwandaka tambula na mwelo.

⁶⁶ Mpe yandi—yandi kuwaka ata mbala mosi ve kima ya mutindu yina, na yawu yandi tubaka, “Yinki ke salama? Samu na yinki makelele nyonso yayi? Yinki ke na kusalama awa?” Mpe bantu vwanda nwana na kuluta.

⁶⁷ Na manima ya mwa ntangu fyoti yandi kuwaka ndinga ya nganga-Nzambi yina mosi yina kwendaka kuna na kuzwa kimvuka samu lukutakanu kuvwanda ve. Yandi kuwaka yandi kutuba, “Ba tubaka na munu ti Nge ke vumbulaka bafwa. Ntangu yayi beto kele na maziamu ya kufuluka na bawu awa na zulu ya mongo, ti beto tala Nge kuwiza kuna mpe kuvumbula bayankaka na ntwala ya beto.”

68 Kasi, beno zaba, Yandi vwandaka kwenda na Jérusalem, samu ba koma yandi na kulunsi. Masumu nyonso ya yinza vwandaka na zulu ya Yandi, mpe Yandi vwandaka kwenda na Jérusalem samu na kukipesa mutindu munkayulu. Mpe bawu sekaka mpe sawulaka Yandi; mpe bayankaka na kati ya bawu vwandaka sakumuna Yandi, mpe bayankaka ya bawu vwandaka singa Yandi. Kaka mutindu ya kele na kutala na konso lukutakanu kisika Yandi kele; bayankaka kele samu na Yandi, bayankaka ke telemina Yandi. Kasi ya vwandaka monana mutindu ti ya vwandaka kwamisa Yandi ve. Yandi vwandaka na kizizi ya Yandi ya kutala na kumanisa kutina ya Yandi. Mpe Yandi landilaka na kutambula, ya kukwikama, na yina Yandi vwandaka kwenda na ntwala, na kutalaka na ntwala na Jérusalem. Mpe bantu ya fyoti kumi na zole salaka kisika na ziunga ya Yandi kuna, na kumekaka na kukanga nkonga ya bantu. Mpe bayankaka vwanza meka na kusimba Yandi. Mpe bayankaka vwandaka boka mpe vwandaka seka Yandi, mpe—mpe nyonso yina.

69 Mpe nkonga ya bantu zolaka dyata kiboba yayi ya mpofo, yandi yina kele kifwanisi ya beto na nkokila yayi, mpe bawu pusaka yandi na yisi. Mpe beto banza ti ya vwandaka na mama mosi ya mbote, ya ntwenia yina kwizaka pene-pene ya yandi, mbala yankaka ya lendaka vwanza mpangi-kento ya Rebecca na disolo ya beto na suka yayi, to ya vwandaka mukwikidi na kati ya Klisto. Mpe yandi monaka bawu kupusa kiboba ya bakala yayi, mpe na kumonaka ti yandi vwandaka . . . bawu vwandaka yimbi na yandi. Kasi samu na kuvwandaka mukwikidi na Yesu, ya salaka yandi muntu ya mbote. Ya ke vwandaka ntangu nyonso mutindu yina. Yina salaka yandi kuvwanza na buzitu na bantu ya kukula mpe na bayina kele na nsatu. Mpe muntu yayi ya kiboba ba pusaka yandi na yisi, mpe kento yayi me kondama na kutelemisa yandi. Kento yayi . . .

70 Yandi zolaka tuba na yandi, kima ya mutindu yayi, “Mama ya ntwenia, mu lenda tuba, na nzila ya ndinga ya nge, nge ke mama ya ntwenia.”

71 “Yinga, mu kele. Nge zola kutelama, kiboba ya bakala? Mu banza ti bawu lenda talisa nge mpasi.”

72 Yandi tubaka, “Samu na yinki makelele nyonso yina? Samu na yinki muvusu nyonso yina, muvusu awa? Ya kele nyonso samu na yinki?”

73 “Mbote,” yandi tubaka, “nge kuwaka ve ti Yesu ya Nazareth, Mwana ya David, kele na kati ya mbanza? Ya kele Yandi yina ke na kuluta, Profete ya Galilée. Nge zola tuba ti nge zaba ve?”

“Ve, mu—mu—mu me kuwaka ntete ve na zulu ya Yandi.”

74 “Mbote, bika mu tuba na nge yina me salama na suka yayi na mbanza. Nge zaba Zachée, muntu yina kele na restaurant?”

“Yinga.”

⁷⁵ “Yandi ke vwandaka ntangu nyonso mutindu ya muntu ya masawula. Kento ya yandi vwandaka mukwikidi. Mpe na suka yayi, Zachée, na zulu ya yinti, samu na kutala mbote Yesu kuluta. . . Mpe beto nyonso zaba ti Yandi kele Profete. Mpe ntangu Yandi vwandaka luta kuna, Yandi telemaka mpe talaka na zulu mpe bokilaka Zachée na nkumbu ya yandi; Yandi vwandaka ata fyoti ve na Jéricho na ntuala.”

⁷⁶ Kiboba ya mulombi me kuma kilo mingi ve. Yandi tubaka, “Na yina ya kele kulungisama ya Deutéronome 18:15, ‘Mfumu Nzambi ya beto ke telemisa profete mutindu Moise.’ Ya fwana vwanda Yandi. Kana Yandi kele, wapi kisika Yandi kele ntangu yayi?”

“Yandi kele kaka pene ya bametele nkama mosi na yisi ya bala-bala.”

⁷⁷ Yandi banzaka ti, Yandi lutaka. Na yawu yandi bandaka na kuboka, “Yesu, Nge Mwana ya David, wila munu mawa. Wila munu mawa, O Mwana ya David. Na yina Nge ke na kuluta, wila munu mawa.”

⁷⁸ Ntangu yayi, na nzutu, Yandi zolaka ata fyoti ve kuwa ndinga ya yandi, samu na kuningana nyonso yina. Bayankaka vwanda kembisa Yandi mpe bayankaka vwanda sakumuna Yandi, mpe bayankaka vwanda singa Yandi. Mpe, samu na kuningana, Yandi zolaka kuwa yandi ata fyoti ve.

⁷⁹ Kasi Yandi vwandaka Ndinga. Mpe ntangu moyo ke na kuboka; mutindu kento yina na dyambu ya menga, yina simbaka lele ya Yandi. Biblia ke tuba, “Yandi telamaka swi.” Ya telemisaka Yandi. Beno banza na yawu, beno banza kaka na yawu; ti mbokolo ya muntu mosi yina ya kufwa meso, kiboba ya mulombi ya mpamba, mpe na masumu ya yinza mpe kizitu na zulu ya Yandi, na kukwendaka na Jérusalem samu na kukuma dikabu ya disumu, kasi mbokolo ya moyo ya muntu mosi me sala Yandi kutelama mpe kuvwanda swi.

⁸⁰ Yandi kele mutindu mosi mazono, bubu yayi, mpe kukonda nsuka. Mbokolo mosi, na nkokila yayi, ke nata Yandi na kosalu, kaka mutindu mosi ya salaka kuna. Mutindu Yandi kele mutindu mosi!

⁸¹ Mu ke bambuka moyo, nkokila mosi na katukaka na Dallas, na Texas. Ya me luta bamvula mingi. Ba kangaka munu na ntoto na—na Memphis. Mpe ba tulaka munu kuna na hotel yina ya lukumu, Peabody Hôtel, ya vwandaka kompani ya mpepo tulaka munu kuna. Mpe ba tubaka na munu ti ba ke bokila munu na suka yina vwandaka landa, samu mu kuzwa limousine na ntangu ya mbote, samu na kuvutuka na mpepo.

⁸² Mpe mu lalaka mbote mpimpa ya muvimba; mu vumbukaka na suka yina landaka, mu sonikaka mwa mikanda, mu vwanda kwenda na poste, na kufidisa yawu. Mu basikaka mpe bandaka

na kukulumuka bala-bala. Mpe na mbala mosi, mu kuwaka Kima mosi kutuba, “Telama, mpe vutuka.”

⁸³ Mbote, beno zaba mutindu bantu ke talaka na nzutu. Mpe mu banzaka, “Mbote, yina vwandaka kukondwa ntembe yina ya vwandaka.”

⁸⁴ Mu kwendaka mwa ntama mingi, mpe Yawu landilaka na kutuba dyaka, “Telama, mpe vutuka.”

⁸⁵ Mbote, mu—mu kwendaka na nsongi mosi, ya vwandaka na pulusu mosi ya nene ya Irlandais kuna na nsongi, mpe mu ve. . . Mu vwanda tala ba-moulinet ya kuloba mpe bima, na kitala-tala. Mpe kana mu telamaka kuna ntangu ya yinda mpe yandi zolaka banza ti mu zola meka na kubaka mosi ya ba-moulinet yango, na yawu mu balukaka mpe bandaka na kuvutuka. Mpe na yina mu vutukaka, na mbangu, na mbangu, mpe mu lutaka kuna na hotel, mpe mu kwendaka kuna na nzadi, kuna. Mu zaba ve, mu banza ti mu lendaka mona kisika yango, na nokila yayi. Mpe mu banzaka, “Awa ntangu ke na kuluta, kasi Kima mosi. . .”

⁸⁶ Beno ke kwikila ti beto lenda vwanda ya kutwadisama na Nzambi? Mpe na yina mu kwendaka kuna, mu—mu. . . Ntangu vwanda luta mpe mu zabaka ti mu zolaka sala nswalu, kasi Kima mosi landilaka kaka na kutuba, “Landila, landila.”

⁸⁷ Mpe na yina mu kumaka na lutale mingi na kuvutuka mpe kubaka mpepo ya munu, mu banzaka, “Mbote, mu—mu fwana landa kaka lutwadusu yayi.” Mpe ya salamaka ti mu vwandaka yimba mwa nkunga yayi, mu kutanaka kaka na beno bantu ya Pantekote, na zulu ya:

Bawu vwandaka ya kuvukana na kivinga ya zulu,
Mpe bawu nyonso vwandaka sambila na Nkumbu ya Yandi,
Mpe botamaka na Mpeve-Santu,
Mpe ngolo ya kosalu kwizaka.

⁸⁸ Beno me kuwaka ntete nkunga yina? “Mpe mu kele na kyese ti mu lenda tuba ti mu kele mosi ya bawu.” Mu vwanda meka na kuvutukila yawu, na kutubaka:

Kwiza, mpangi ya munu, sosa lusakumunu yayi
Yina ke vedisa ntima ya nge na disumu.

⁸⁹ Mpe na yina mu vwandaka tambula, na bala-bala, Mu talaka, mpe ya vwandaka na kiboba mosi ya kento ya mutindu Tata-kento Jemima, yina vwandaka ya kuyekama na zulu ya mwa lupangu mosi, mpe mwa yinzo mosi, yina bantu ya ndombe ke vwandaka kuna, mutindu ya mwa yinzo mosi, yina ba me pakula mpembe, ya kuyekama na lupangu. Yandi vwandaka na simisi ya kukanga na zulu ya yintu ya yandi.

⁹⁰ Mpe mu bikaka kaka kuyimba mpe bandaka na kutambula. Mu zabaka ve kisika mu vwandaka kwenda; Yandi tubaka kaka,

“Landila, landila kaka na kutambula.” Mpe na yawu ntangu mu kumaka pene-pene mingi na yandi, mu monaka ti yandi vwandaka seka mwa fyoti. Mpe mu talaka yandi, mpe mu balulaka yintu ya munu mpe mu kwendaka na ntuala.

⁹¹ Yandi tubaka, “Mbote, pasteur.” Mbote, na Sude, *pasteur* zola kutuba “mulongi.”

Mpe mu—mu tubaka, “Mbote, tata-kento.”

⁹² Mu talaka na manima, mpe mu banzaka, “Wapi mutindu yandi me zaba ti mu vwandaka pasteur?” Mpe mu vwandaka ve na Biblia to kima mosi.

Mu me vutuka. Mu me tuba, “Wapi mutindu nge me zaba ti mu vwandaka pasteur?”

Yandi tubaka, “Mu zabaka ti nge vwandaka kwiza.”

Mpe mu tubaka, “Ya kele mutindu ya ngitungulu, samu na munu.”

⁹³ Mpe—mpe yandi tubaka, “Nge me tangaka ntete na Biblia na kento ya Sunamite?”

Mu tubaka, “Oh, yinga, mama.”

⁹⁴ Yandi tubaka, “Nge zaba, yandi vwandaka ve . . . vwandaka kisita, yandi lendaka ve kuzwa bana.”

Mu tubaka, “Yinga, mama, mu ke bambuka moyo na disolo yango.”

⁹⁵ Yandi tubaka, “Mpe yandi silaka Mfumu, mpe yandi zolaka kusansa bébé yina na Mfumu, ya kieleka.” Mpe yandi tubaka, “Nge zaba, mu vwandaka mutindu ya kento yina.” Yandi tubaka, “Mu lendaka ve kuvwanda na bana, bakala ya munu mpe munu.” Mpe yandi tubaka, “Mu silaka Mfumu, kana Yandi pesa munu bébé, ti mu ke sansa yandi samu na Yandi.” Yandi tubaka, “Yandi pesaka munu bébé.” Mpe yandi tubaka, “Mu me sansa mwana-bakala yina ya kulutila mbote mutindu mu lendaka sala, samu na kusadila Mfumu.” Yandi tubaka, “Kasi, nge zaba,” yandi tubaka, “yandi kotaka na kimvuka ya bantu ya yimbi, mpe yandi me kuzwa kimbevo na nzutu ya yandi.” Mpe yandi tubaka, “Dokotolo me sala yandi bantumbu nyonso yina yandi lendaka pesa yandi. Mpe ya me kuma na kitezo ya mpasi mingi,” yandi tubaka, “menga ya yandi me kuma na kitezo ya yiya, ya kele kimbevo na nzila ya menga,” syphilis. Mpe na yina yandi tubaka, “Ndambu ya menga ya yandi ke na kuluta ve na kati ya ntima ya yandi. Ntima ya yandi kele na mabulu na kati ya yawu.” Mpe yandi tubaka, “Yandi kele ya kulala na kati kuna, ya kukondwa kuzaba kima mosi.” Mpe yandi tubaka, “Dokotolo mosi vwandaka awa, bilumbu zole me luta, mpe yandi tubaka, ‘Yandi ke vumbuka dyaka ve. Yimeni samu na Yandi.’”

⁹⁶ Mpe yandi tubaka, “Mu lenda kaka ve kutelama kumona bébé ya munu kufwa mutindu yina.” Mpe yandi tubaka, “Na yina

mu—mu—mu sambilaka mpimpa nyonso, ‘Mfumu, kana Nge ke baka yandi . . . Nge pesa yandi na munu; kasi mu—mu—mu zola kuwa yandi kutuba ti yandi kele ya kuvuuka, na yawu mu zaba ti mu ke kutana na yandi dyaka.’” Mpe yandi tubaka, “Mu—mu sambilaka, mpe mu sambilaka kisambu mutindu salaka kento ya Sunamite.”

⁹⁷ Mpe yandi tubaka, “Mu—mu kwendaka lala, mpe mu lotaka ndosi mosi.” Yandi tubaka, “Mpe mu tubaka na Mfumu, yandi tubaka, ‘Nge pesaka munu bébé yayi.’ Mpe yandi tubaka, ‘Mu vwandaka mutindu kento ya Sunamite, kasi wapi kisika kele profete ya Nge?’ Mpe yandi tubaka, Yandi tubaka, ‘Tala, yandi ke na kwiza awa.’ Mpe mu monaka bakala mosi na mwa yimpu mosi ya kuvwanda na lweka ya yintu ya yandi, yina me lwata kazaka yina ya mpembe, yina vwandaka kulumuka na bala-bala.”

⁹⁸ Mpe yandi tubaka, “Yina vwandaka pene ya ngunga yiya na suka yayi.” Yandi tubaka, “Mu me telama awa kubanda ngunga yina.”

Yandi kele dyaka Nzambi. Yandi ke pesaka mvutu na balweka nyonso zole.

⁹⁹ Mu tubaka, “Nkumbu ya munu kele Branham. Mu ke sambilaka samu na bambevo. Nge me kuwaka ntete na ministere ya munu?”

¹⁰⁰ Yandi tubaka, “Ve, tata, Pasteur Branham, mu me kuwaka ntete ve na zulu ya nge.” Mpe yandi tubaka, “Nge zola kukota ve?”

¹⁰¹ Mpe ntangu mu kwendaka samu na kuzibula mwelo, ya vwandaka na mwa kibaka mosi ya ntama kuna, mpe mwelo vwandaka na nsoso ya charrue ya kunamika na zulu ya yawu, mutindu kuna na Arkansas. Ya vwandaka kaka na simu yina ya nzadi, na mutindu nyonso, samu beno zaba yina ya vwandaka. Na yina mu bendaka mwelo mpe mu kotaka.

¹⁰² Ntangu mu kotaka na yinzo yina, mu vwandaka na bayinzo ya bantinu, bantinu tatu to yiya ya mutindu na mutindu, ntinu ya Angleterre, Ntinu Gustaf ya Suède, bisika mingi, ke na kwiza, ke sambila na bawu, mu kwendaka, mu sambilaka na bawu, mpe mu vwandaka na mwa bayinzo ya kulutila kitoko, mu banza, na Hollywood, kasi ata mbala mosi ve mu kuzwaka nkwiwizulu ya mbote kulutila na yina mu kuzwaka na yina. Kaka mwa kivinga mosi ya ntama, bivinga zole, mwa cuisine na manima, mwa kivinga ya kulalila awa, na mwa mbeto ya ntama na bapoto. Ya vwandaka ve na bapin-up na kibaka. Kasi ya vwandaka na kidimbu kuna, yina tubaka, “Nzambi sakumuna yinzo ya beto.”

¹⁰³ Mu talaka, ya kulala kuna, mpe mwana-bakala mosi ya ndombe ya nene, na kutala vwandaka na bamvula kumi na nana, ya nene, ya ngolo, mwana ya bakala ya mavimpi ya mbote na kutala. Mpe yandi vwandaka na bulanketi na diboko ya yandi, mpe yandi vwandaka kwenda, “Uh! Uh!”

Mpe mu tubaka, “Wapi dyambu na yandi?”

¹⁰⁴ Yandi tubaka, “Yandi—yandi ke banza ti yandi kele kuna na mubu ya mpimpa, ya kuzimbana. Mpe yandi tubaka, yandi ke landila na kutuba ti yandi me ‘zimbana, kuna na mubu,’ mpe yandi lenda ve kumona nzila ya yandi. Yandi ke banza ti yandi kele na zulu ya bwatu.” Yandi tubaka, “Yandi ke sala yawu bilumbu zole to tatu.” Mpe yandi tubaka, “Mu—mu lenda kaka ve kubika yandi kufwa mutindu yina.” Yandi tubaka, “Nge ke sambila samu na yandi?”

Mu tubaka, “Yinga, mama.”

¹⁰⁵ Mu bandaka na kutubila kubeluka ya nzutu. Yandi vwandaka sepela ve na yawu. Yandi vwandaka zola kaka kuwa yandi kutuba ti yandi me kuzwa mpulusu. Yawu yina kaka yandi vwandaka sepela, ti yandi vulukaka. Mpe mu—mu tubaka ti yandi kele. . .

¹⁰⁶ Yandi me belama mpe me baka yandi na yintu mpe me benda yandi na manima, me pesa yandi bize na ditama, mpe yandi tubaka, “Nzambi sakumuna bébé ya mama.”

¹⁰⁷ Mu vwandaka ya kutelama kuna vwandaka tala yawu, mpe mu banzaka, “Yinga, yinga, yawu yina.” Ata wapi mutindu nsoni yandi me nata na dibuta, wapi mutindu ntama yandi kele, ata yinki mpassi yandi kele na kati, yandi kele dyaka “bébé ya mama.”

¹⁰⁸ Mpe mu banzaka, “Biblia me tuba, ‘Mama lenda zimbana mwana ya yandi ya fyoti, kasi Mu lenda zimbana nge ve. Nge kele. . .’ Wapi mutindu ya zola ya kele! ‘Bankumbu ya beno kele ya kusonika na zulu ya mpusu ya diboko ya Munu.’”

¹⁰⁹ Yandi pesaka yandi bize. Beto fukamaka. Mu vwandaka ya kuvwanda na makulu ya mbeto. Mu tulaka maboko ya munu na zulu ya makulu ya yandi, ya vwandaka tiya, mwa ya maza.

¹¹⁰ Mpe mu—mu tubaka, “Tata-kento, nge zola kusambila ntete?” Mpe, nkundi ya munu, mu zabaka ti yandi me zonzaka na Yandi. Oh, wapi kisambu yandi salaka na Nzambi!

Na yina yandi tubaka, “Nge zola kusambila?”

Mpe mu tubaka, “Yinga, mama.”

¹¹¹ Mu tubaka, “Tata ya Mazulu, mu me luta ngunga mosi landila ngunga mu zolaka baka mpepo. Nge tubaka na munu na—na kukulumuka awa, mpe kulandila kaka na kukwiza. Mpe na manima mu zaba ve kana yayi kele kisika yina Nge zolaka ti mu kuma, to ve, kasi yayi kele kisika mu me telama. Kana Nge fidisaka munu na kusambila samu na mwana-bakala yayi. . .”

¹¹² Mpe kaka na ntangu yina, yandi tubaka, “Oh, mama!”

Yandi tubaka, “Yinki bébé ya mama ke zola?”

113 Yandi tubaka, “Ya ke na kuzwaka nsemo na kati ya kivinga.” Pene ya baminuti tanu, yandi vwandaka ya kuvwanda na zulu ya mbeto.

114 Mu me basika na nswalu nyonso, mu me kwenda. Mu banzaka, “Mbote, mu lenda baka kaka taxi, yimeni, mpe kuingila kilumbu mosi, to ntangu nyonso yina mu lenda kuzwa mpepo yankaka.”

115 Kaka na ntangu mu vwandaka kwenda na mwelo, bangunga zole na kima na manima ya ntangu, Mu kuwaka bawu kutuba, “Lubokilu ya nsuka ya kupumbuka ya numelo makumi sambanu na sambwadi, na Louisville, na Kentucky.”

116 Yinki? Yinki? Kimpwanza ya Nzambi! Beno me mona? Kisambu mpe lukwikilu ya mwa kento yina ya mputu, ya mpamba, ya ndombe, kangaka mpe simbaka mpepo yina na ntoto kuna. Yandi kele Nzambi mosi yina lendaka kutelama mpe kubaluka na mulombi ya kufwa meso na—na bibaka ya Jéricho. Yandi kele Nzambi mosi mazono, bubu yayi, mpe kukonda nsuka. Ya kele lukwikilu yina ke salaka yawu. Yandi zola ti beno kwikila yawu.

117 Na yina, pene ya bamvula zole na ntuala mu vwandaka luta kuna na train, mu vwandaka kwenda, mu vwandaka vutuka na Phoenix. Mpe, beno zaba, ba ke futisa beno mingi samu na ba-sandwiche ya bawu, Na mumesanu mu ke mekaka na kukwenda na station mpe kuzwa munu mwa ba-hamburger, saki ya kifuluka na yawu, samu na kusala munu tii ntangu mu ke kulumuka, mpamba ve ti ba ke futisa beno makumi sambwadi na tanu ya ba-cents samu na mwa sandwiche ya ntama yina ba me zenga fyoti mingi ti ya kele kaka na lweka mosi na yawu. Mpe—mpe yawu, ntangu yayi, ya kele kima mosi ya boma. Mpe mu—mu me dumuka na Memphis. Mpe kana muntu me vwandaka ntete na Memphis, yandi zaba mutindu train ke sikamaka kuna mpe ke bakaka table tournante. Mu me dumuka mpe me kwenda mbangu na kiosque ya ba-hamburger.

Mu kuwaka muntu kutuba, “Mbote kuna, Pasteur Branham!”

118 Mu talaka na ziunga, awa vwandaka mwa muntu na yimpu ya mbwaki ya kutelama kuna, nangulaka yintu. Mu tubaka, “Mbote, mwana,” mu bandaka na kuvutuka.

Yandi tubaka, “Nge zaba munu ve, mutindu yina?”

Mu tubaka, “Ve, mu banza ve ti mu zaba nge.”

119 Yandi tubaka, “Nge zaba, kilumbu mosi nge kwizaka na yinzo ya munu.” Mpe yandi tubaka, “Mama ya munu vwandaka ya kutelama na ngaanda, mpe nge simbaka yandi na dipeka, yandi vwandaka ya kupola.”

Mu tubaka, “Nge ke mwana-bakala yina ve?”

¹²⁰ Yandi tubaka, “Yinga, mu kele yandi.” Yandi tubaka, “Yinga, mu—mu kele mwana ya bakala yina.” Yandi tubaka, “Mu—mu me beluka kaka ve,” kasi yandi tubaka, “Mu—mu—mu me kuzwa mpulusu kubanda ntangu yina, mpe.” Na yawu, yina, ya vwandaka mutindu yina.

¹²¹ Oh, lemvo ya ngitukulu! Nzambi mosi yina, ti mpofu lendaka kanga Yandi, mwa kento ya mpamba, ya ndombe, lendaka kukanga mpepo na ntoto. Bisambu mpe lukwikilu ya yandi na Nzambi! Yandi vwandaka kwikila yawu.

¹²² Yesu telamaka swi. Kizizi yango ya mpofu telemisaka Yandi kaka na nzila ya Yandi. Mu ke zola kuzwa mwa bankokila, samu na kulonga dilongi yina, “Mpe na manima Yesu telamaka swi.” Kasi kuna Yandi telamaka, tubaka, “Beno nata yandi awa.” Amen.

¹²³ Mu vwandaka tanga disolo mosi na zulu ya mpofu Bartimée, awa ntama mingi ve, ntangu mu vwandaka baka disolo ya Biblia; ya lendaka vwanda mambu bantu vwanda zonzaka. Kasi ya me tuba ti yandi ke kwikilaka ntangu nyonso na kubeluka ya nzutu. Ata nyonso yina banganga-Nzambi tubaka, yandi kwikilaka dyaka na yawu. Ya vwanda tuba ti yandi vwandaka bakala ya kukwela, vwandaka na kento, mpe mwa mwana ya kento yina yandi me monaka ntete ve. Yandi vwandaka pene ya bamvula yina kuna, pene ya bamvula kumi na sambanu. Yandi me monaka yandi ata fyoti ve. Ya tubaka yina yandi salaka samu . . .

¹²⁴ Beno zaba, beno fwana kuzwa kima ya mutindu yankaka na muntu yankaka, ntangu beno ke lomba, to beno lenda ve kubenda bukebi ya bantu. Na Inde, bawu—bawu bikaka mosi ya mwa ba-mangouste yayi kufwa cobra, mpe kima yankaka yina bawu lenda sala samu na kubenda bukebi. Mu monaka dikaku ke baka kitini ya yinti mpe ke bula kaka ballon, na bala-bala, kima yankaka, samu na kubenda bukebi, na yina ba ke pesa bawu mbongo.

¹²⁵ Mpe ya vwanda tuba ti Bartimée vwandaka na mwa bayembe zole yina vwandaka sala, yina vwandaka baluka, mutindu mwa . . . kuna na zulu ya mosi na yankaka, mpe yina vwandaka sepelisa bantu, banzenza, mpe bawu vwanda pesa yandi mbongo.

¹²⁶ Mpe ya tubaka ti na nkokila mosi ti kento ya yandi—ya yandi belaka mingi. Mpe bawu bokilaka dokotolo, mpe dokotolo tubaka, “Bartimée, ya ke na kima mosi ve mu lenda sala. Yandi, mu lenda zenga ve fièvre yina.”

¹²⁷ Mpe ya tubaka ti yandi belamaka na kubulaka nkawa ya yandi na kibaka, mpe basikaka na ngaanda ya yinzo, mpe tubaka, “Yehowa, mu zola Nge. Mu ke kwikila Nge. Mu kele na kima ve mu lenda pesa Nge. Mu kele na mwa bayembe zole awa, na nzila ya yina mu ke kuzwaka mbongo. Kasi kana Nge ke bika kaka kento ya munu ya luzolo kuvwanda na munu samu

na kusadisa na kusansa mwana ya munu; mpe mu kele mpofo, mpe mu lenda mona ve; kana Nge ke bika kaka kento ya munu kubeluka na yina yandi lenda sadisa munu, Mu ke sila na Nge, mbasi mu ke sala munkayulu ya nene. Mu ke baka mwa bayembe ya munu, dikabu samu na dikabu ya munu.”

128 Mbote, ba tubaka ti kento ya yandi kumaka mbote mingi. Yandi bakaka bayembe mpe pesaka yawu na munkayulu.

129 Ntangu yankaka na manima ya yina, mwa mwana ya yandi ya kento belaka. Yandi vwandaka mpe na kisika ya lufwa, na yawu yandi kwendaka sambila dyaka. Yandi tubaka, “Yehova, mu kele na kima ve yina me bikana, kasi mu kele na mwana-dimeme ya munu.” Mpe na bilumbu yina, mwana-dimeme vwanda twadisaka mpofo mutindu ke salaka tangu yayi yimbwa ya muntu ya kufwa meso, ba longisaka bawu samu na kutwadisa mpofo. Mpe yandi vwandaka na mwana-dimeme yina vwanda twadisaka yandi na poto ya yandi kisika yandi vwanda lombaka. Yandi tubaka, “Kima kaka mosi me bikana na munu, Yehowa, kele mwana-dimeme yayi.” Mpe yandi tubaka, “Kana Nge ke bika kaka mwana ya munu ya kento kuzinga, ata ti mu me monaka yandi ata fyoti ve, kasi yandi kele ngolo mingi ntangu mu ke simbaka nsuki ya yandi na maboko ya munu.” Mpe yandi tubaka, “Yandi zola munu, mpe mu zola yandi.” Mpe yandi tubaka, “Yehowa, kana Nge ke bika yandi kuzinga, mu ke—mu ke pesa Nge mwana-dimeme ya munu, samu na munkayulu.”

130 Mpe mwana ya yandi ya kento kumaka mbote. Mpe awa yandi vwandaka, vwandaka kwenda na tempelo na mwana-dimeme. Mpe nganga-Nzambi me basika mpe me telama na zulu ya balcon, mpe me tuba, “Mpofo Bartimée, wapi kisika nge ke kwenda, na suka yayi?”

131 Yandi tubaka, “Mu ke kwenda na tempelo, samu na kupesa mwana-dimeme yayi mutindu munkayulu.”

132 “Oh,” yandi tubaka, “mpofo Bartimée, nge lenda sala yawu ve.” Yandi tubaka, “Mu ke pesa nge mwa mbongo, mpe nge ke kwenda na ba-enclos, mpe nge ke sumba mwana-dimeme mpe ke pesa yawu munkayulu.”

133 Yandi tubaka, “Mu silaka Nzambi ata fyoti ve mwana-dimeme yankaka. Mu silaka na Nzambi mwana-dimeme yayi.”

134 Yandi tubaka, “Kasi, mpofo Bartimée, nge lenda ve kupesa mwana-dimeme yina, samu ti mwana-dimeme yina kele meso ya nge.”

135 Yandi tubaka, “Kana mu tumama na nsilulu ya munu na Yehowa, Yandi ke kubika mwana-dimeme samu na meso ya munu.”

136 Yandi kuzwaka, na suka yayi ya madidi ya Ngonda ya kumi na mosi, Mwana-dimeme yina ba pesaka samu na mpofo Bartimée. Yandi tubaka, “Beno nata yandi awa.” Yandi

tentikaka maboko ya Yandi na zulu ya meso ya yandi, mpe Mwana-dimeme yina ya Nzambi zibulaka meso ya yandi.

¹³⁷ Bankundi, beno zaba, ya lendaka vwanda na mingi ya kutuba na disolo yayi na zulu ya Yandi ke na kukwendaka na kukomama na kulunsi, kasi beto ke baka yawu mwa ntangu fyoti na ntwala. Beno zaba, Mwana-dimeme yina mosi me kubika na nkokila yayi samu na meso ya beno, mpe? Mwana-dimeme yina mosi kele awa na nkokila yayi. Nzambi kubikaka. Yandi kele ve na yankaka, ata mbala mosi ve ke vwanda na yankaka. Ya kele Mwana-dimeme yina Nzambi kubikaka. Beno ke kwikila yawu?

¹³⁸ Mu me tala na montele ya munu, mu kele yimeni pene ya baminuti makumi zole na ngunga kumi, mpe mu vwanda meka na kusukisa na ngunga ya yivwa, samu beto basika na ngunga ya yivwa na ndambu, na ngunga ya mumesanu.

¹³⁹ Kasi beto kulumusa bayintu ya beto na mwa ntangu fyoti. Mu zola ti meso nyonso kuvwanda ya kukangama ntangu yayi, mpe bayintu ya beno ya kukulumusa. Beno vwanda kieleka na luzitu na mwa ntangu fyoti.

¹⁴⁰ “O Yesu, Nge Mwana ya David,” bokaka mulombi, “wila munu mawa.” Mpe yandi lendaka ve kuvwanda swi. Yandi—yandi fwana . . . yandi—yandi fwana benda bukebi ya Yandi. Mpe beno ke kwikila ve na nkokila yayi ti kuboka ya beto mosi ke nata dyaka Yandi na kisalu? Ya salaka kuna. Samu na yinki ya lendaka sala dyaka yawu ve?

¹⁴¹ Ntangu yayi na yina beno ke kulumusa bayintu ya beno mpe ntima ya beno, mu zola ti beno boka na Yandi, “Yesu!” Beno bokila Yandi ve Mwana ya David, samu ti Yandi kele ve Mwana ya David na beno, Yandi kele Mfumu. “Yesu, Mfumu, wila munu mawa. Zibula meso ya munu ya kufwa. Mu me kuwa longi yayi yina kele na beto na nkokila yayi, kutuba ti Nge silaka na kukitalisa Nge mosi na nkuna ya Abraham, na bilumbu ya nsuka, mutindu Nge salaka na Abraham mpe nkuna ya yandi ya kilumbu yina. Nge silaka yawu, ti Nge kele Ndinga.

¹⁴² “Na mwa bankokila me luta, mu—mu me mona bima ya ngitukulu. Yandi tubaka, na Santu Jean, mu zaba, 14:12, ‘Yandi yina ke kwikila na Munu, bisalu yina Mu ke sala yandi mpe ke sala yawu.’ Mpe kento yango simbaka lele ya Yandi, mpe Yandi zabaka yina vwandaka mpassi ya yandi, mpe samu ti—ti yandi vwandaka talisa lukwikilu mingi yina. Mbote, kukwikila ti Yandi vwandaka, lukwikilu ya Yandi na yina yandi salaka, Yandi tubaka ti yandi vwandaka mbote, Yandi tubaka, ‘Lukwikilu ya nge me vulusa nge.’ Mpe bakala ya mpofu na mwelo ya Jéricho, kima mutindu mosi. Muntu na yinti, na suka yayi, ba lemvokilaka yandi masumu ya yandi.

¹⁴³ “Zibula meso ya munu ya kufwa, Mwana-dimeme, samu mu zaba ti mu kele na Mvwandulu ya Yandi, ti Yandi kele awa. Nge tubaka, ‘Kisika zole to tatu me vukana na Nkumbu ya Munu,

Mu—mu kele na kati-kati ya bawu.’ Zibula meso ya munu ya kufwa, mpe wila munu mawa, O Mwana-dimeme ya Nzambi.”

144 Mpe na yina beno ke sambila mutindu yina, kaka kana ya kele na ntembe na dibanza ya beno, ti ya me vwanda na ntembe na kima mosi. . .Beto kele kaka ntangu yayi na kilumbu ya lukutakanu ya nene ya kubeluka ya nzutu. Kana ya me vwanda na ntembe na zulu ya yawu, beno lenda ve kulomba Yandi na kukatula makalu nyonso na meso ya beno, ti beno lenda bakula na mutindu ya kulunga?

145 Bankokila fyoti yayi, mu vwanda meka, na ntima ya munu nyonso, samu na kunata beno na kumona kima mosi, ti Yandi ke pesa kidimbu ya Yandi ya nsuka na dibuundu, ntete Yandi baluka na ba-Juif. Kento ya makwela ya Bantu ya makanda ke bokilama.

146 [Mpangi mosi ya bakala ke na kuzonza bandinga mpe me tendula—Mu.] Amen. Ntangu yayi kana mu me bakula mbote, na yina beno ke na kusambila, Mpeve-Santu ke zonga mpe na manima ke pesa lutendulu, Nzambi ke pesa beno mbokolo.

147 Bantu yikwa na kati awa ke zola Mwana-dimeme yina Nzambi kubikaka samu na kuzibula meso ya beno, samu beno kumona Yandi awa ntangu yayi, awa? Beno zola kutelemisa diboko ya beno, kutuba, “Nzambi, zibula meso ya munu ya kufwa. Ti mu kuzwa wvale ya munu kukatuka na ntima ya munu, Mfumu, ti mu bakula.”

148 Mpe ntangu yayi wapi mutindu Yandi ke zabana? Wapi mutindu beto ke zaba Yandi? Na nzila ya nkadulu ya Yandi, yinki Yandi ke sala, bisalu ya Yandi. Yandi tubaka, “Mu kele vinu, beno kele mavala.” Ntangu yayi, divala ke buta mbuma, vinu ve. Vinu ke pesaka ngolo na kintala. Mpe kana kintala kubuta, to vinu kubuta kintala, ya kele na bambuma ya vinu na zulu ya yawu; vinu yina ke landa ke basika, to ke buta na vinu yina, ke kuzwa bambuma ya vinu na zulu ya yawu. Kana dibuundu ya ntete yina basikaka na vinu yina, vwandaka dibuundu ya pantekote, na makabu nyonso, kana ya kieleka ya ke basisa divala yankaka, ba ke sonika Buku yankaka ya ba-Actes na manima ya yawu. Mpe ya kele yina bawu kuzwaka na bilumbu ya bantumwa, mpe nsungi ya bantumwa sukaka ata fyoti ve.

149 Pierre tubaka, na Kilumbu ya Pantekote, “Beno balula ntima, mosi na mosi ya beno, mpe beno botama na Nkumbu ya Yesu Klisto samu na lemvo ya masumu, beno ke kuzwa dikabu ya Mpeve-Santu. Samu ti nsilulu kele samu na beno, mpe samu na bana ya beno, mpe samu na bayina kele ntama, mpe bayina nyonso Mfumu Nzambi ya beto ke bokila.” Mpe ntangu nyonso Nzambi ke bokila dyaka, nsungi ya bantumwa ke landila kaka na kukwenda na ntwala. “Samu nsilulu,” nsilulu mutindu ya vwandaka na ntangu yina, “ya kele samu na beno, mpe samu na

bana ya beno, bayina kele ntama, mpe ya mingi Mfumu Nzambi ya beto ke bokila.”

¹⁵⁰ Mfumu, zibula meso ya beto, mpe bika ti beto mona Mwana-dimeme yina ba kubikaka. Nge silaka ti . . . ti Nge ke kukitalisa Nge mosi na bilumbu ya nsuka, mutindu Nge salaka na Sodome, ntangu Mwana ya muntu kumonisamaka pwelele. Beto ke sambila, Nzambi, ti Nge ke pesa yawu ntangu yayi. Beto kele bantu ya Nge, Mfumu. Beto kele bavinu ya Nge.

¹⁵¹ Beto kele ya kulunga ve, beto kele ya kulunga ve na kulomba kima mosi; kasi kana beto ke banza na yawu, na yina beto ke vwanda fyoti mingi, beto ke vwanda mbote mingi ve. Kasi, Mfumu, ntangu mu ke tala na zulu Kuna mpe mu ke mona ti ya kele na Mwana-dimeme yina ba kubikaka samu na munu, ya kele na Mwana-dimeme yina ba kubikaka, na yina Nzambi ke monaka munu ve, Yandi ke monaka Mwana-dimeme ya munu. Mpe mu zaba ti ya kele ve na kima ya yimbi na Mwana-dimeme yina. Ba ndimaka yawu yimeni.

¹⁵² Ntangu yayi, Mfumu, bika ti Ndinga ya Nzambi kukitalisa Yawu mosi na kati-kati ya beto, na nkokila yayi, ti lukwikilu yayi ya Bartimée yina kele awa, bawu nyonso, mpe bakento na dyambu ya menga mpe nyonso yina ya vwandaka, mpe ya Simon Pierre, mpe nyonso yankaka ya mutindu na kati awa, yina kele na nsatu, Zachée na yinti. Talisa Nge mosi, Mfumu, na nzila ya nzutu ya muntu. Ti Ndinga ya Nge kuvwanda ya moyo na kati-kati ya beto, na nkokila yayi, ti beto ke zaba mpe ke mona ti Nge kele Nzambi. Mpe bika ti meso nyonso ya kufwa kuzibuka na lubakusu, Mfumu, ti ntangu lukutakanu yayi ya nene ya kubeluka ya nzutu ke banda, ti mosi na mosi ya bawu kubeluka. Bana yayi nyonso ya fyoti, mpe—mpe bantu yina kele na ba-béquille, mpe—mpe nyonso yina ke tambula mbote ve na bawu, na bankawa ya mpembe, ti bawu basika awa mutindu mpofo Bartimée salaka. Yandi kuzwaka kumona ya yandi. Pesa yawu, Tata. Beto ke lomba yawu na Nkumbu ya Yesu Klisto. Amen.

¹⁵³ Ntangu yayi beto me sambila. Mpe ntangu yayi—ntangu yayi na pima nyonso ntangu yayi, na pima nyonso, beno kwikila. Ntangu yayi yina mu . . . Mwa disolo yayi, yina ya kele, ya kele to kieleka to ya kele ve kieleka. Mpe Klisto kele mutindu mosi mazono, bubu yayi, mpe kukonda nsuka. Ntangu yayi wapi mutindu beno ke zaba Yandi?

¹⁵⁴ Yinki kana muntu mosi kukwiza awa ntangu yayi ya kulwata robe, mpe na mandefo mpe nsuki mutindu mufikudi fikulaka Yandi, bidimbu ya bansonso na diboko ya yandi, mpe menga ke basika na kizizi ya yandi? Ya ke vwanda ve Yesu. Ve. Yandi kele ya kuvwanda na diboko ya kibakala ya Kimfumu; ntangu Yandi ke kwiza, konso dibolongo ke fukama mpe konso ndinga ke funguna. Na yawu . . . kasi wapi mutindu beno ke zaba

Yandi? Kaka muntu nyonso ya luvunu lendaka fikula bawu mosi mutindu yina mpe kusala mutindu yina. Kieleka.

¹⁵⁵ Kasi wapi mutindu beno ke zaba Yandi? Yandi kele ntangu beno ke mona nkadulu ya Yandi, Ndinga ya Yandi me monisama mpe ke sala kaka kieleka yina Yawu ke salaka ntangu nyonso, na yina beno zaba ti ya kele Yandi. Ya kele kieleka? “Bisalu yina Mu ke salaka.”

¹⁵⁶ Ntangu yayi, beno me mona, beno bika kaka beno mosi kukwikila na Yandi ntangu yayi. Beno kwiza. Beno bika ve mabanza ya beno kukwenda mpongi, mutindu bantu ke tubaka. Beno sala yawu ve. Beno ke kwiza ve na Nzambi, na kisaka-saka. Beno ke kwiza na Yandi, na mayela, na Ndinga ya Yandi. Beno nata Ndinga na ntwala ya beno, mpe beno tuba, “Mfumu, Nge salaka nsilulu. Mu me lomba nge na kuzibula meso ya munu. Bika lukwikilu ya munu kutelemisa Mfumu Yesu, na nkokila yayi. Ti Yandi baluka na munu, mpe tuba na munu mutindu Yandi. . .kento yina salaka, bamvula mingi me luta.” Mpe nge ke kwikila na ntima ya nge ya muvimba.

¹⁵⁷ Ntangu yayi, mutindu mu lenda mona, na kati ya kivinga, ya kele ve na muntu yina mu ke mona ti mu zaba. Beno nyonso kele banzena.

¹⁵⁸ Mpe bantangu yankaka beno ke banzaka ti ya kele kaka bantu yayi awa na ntwala ke baka yawu. Ve, ve. Nzila. . .Mu ke kipe ve kisika beno kele, beno kwikila kaka. Mu ke kipe ve, kisika nyonso na kati ya kivinga. Yandi zaba nani beno kele mpe wapi kisika beno kele.

¹⁵⁹ Ntangu yayi beno tala kana Yandi kele mutindu mosi mazono, bubu yayi, mpe kukonda nsuka, kana lukwikilu ya beno lenda kanga Yandi, mutindu Bartimée salaka. Beno fwana vwanda ve mulombi. Beno fwana boka ve mutindu yandi salaka. Kuboka kangaka Yandi ve. Yandi kuwaka yawu ve. Ya kele lukwikilu yina telemisaka Yandi. “Lukwikilu ya nge!” Yandi tubaka ve “kuboka ya nge me vulusa nge.” “Lukwikilu ya nge me vulusa nge.” Beno me mona, “Lukwikilu ya nge me vulusa nge.” Mbote mingi.

Mfumu kusakumukwa!

¹⁶⁰ Mu ke kukiyufula kana longi yina me vwanda kuna, mpangi ya bakala ya kukula yina vwanda longaka bamvula makumi sambanu na tanu, lenda sala munu faveur? Nge zola kusala yawu, tata? Tentika diboko ya nge na zulu ya kento yina kele ya kuvwanda pene-pene ya nge, mpe mpasi ya ntima ke bika yandi. Mbote mingi, kaka yina. Beno ke kwikila yawu, mpangi ya kento? Mbote mingi, kaka yina.

¹⁶¹ Yinki yandi me simba? Mu me monaka yandi ata fyoti ve, kasi ya me salama. “Kana nge lenda kwikila!” Beno me kwikila ntangu yayi?

162 Yina ke talisa Yandi? Meso ya beno me zibuka? Na yina beno tala na Yandi, Yandi kele mbote, Munungi ya Ngolo! Ya kele ve na kima mosi, ata credo mosi ve, ata denomination mosi ve, muntu ya science ve, to kima mosi ve, yina lenda kanga Yandi. Yandi kele Nzambi. Amen. Mu ke telemina muntu nyonso na kati awa na kukwikila yawu, ti Yandi kele awa ntangu yayi.

163 Bantu yikwa me monaka foto ya Wanzio ya Mfumu na zulu ya mukanda, yina ba kele na yawu na Washington? Yandi kele ya kutelama kaka awa na estrade yayi na ntangu yayi. Kieleka! Mu zaba ti Ya kele awa. Mu zaba yawu. Mu kele fanatiki ve. Mu kele ntama na yawu. Mu ke tuba na beno Kieleka ya Masonuku. Beno ke kwikila yawu mpe ke mona yina ke salama.

164 Awa, Yawu yayi dyaka. Mama yayi ya ndombe me vwanda kuna na nsuka, yandi ke tala bisika nyonso. Ya kieleka, yandi ke zola kuzwa lemvo ya Nzambi. Yandi kele longi ya kento, mpe yandi ke na kusambila Nzambi na kusadisa yandi na ministere ya yandi. Ya kele kieleka ve, mama? Telemisa diboko ya nge, kana ya kele kieleka. Mu me monaka yandi ata fyoti ve, yandi ke kaka nzenza mingi samu na munu mutindu kento yina ya fyoti, ya ndombe vwandaka yina kuna na Tennessee na ntangu yina.

165 Ya kele na muntu, bakala ya mundombe ya kuvwanda kuna ke na kutalaka nge, ya mutindu me sepela na yawu. Nge ke kwikila ti mu kele kisadi ya Nzambi, tata? Nge ke kwikila? Kento yina me simba nge kaka mutindu bawu salaka, na kutubaka, “Vwanda na kibakala.” Mu ke bokila nge ve, kasi Yandi ke bokila nge. Kana nge ke kwikila yawu na ntima ya nge ya muvimba, diabete yina ke bika nge. Nge ke kwikila yawu? Amen. Mbote mingi, na yina nge lenda kuzwa yawu. Amen. Lukumu na Mfumu! Yawu yina.

Yinki yandi me simba? Yandi me simba munu ata fyoti ve. Yandi me simba Yandi.

166 Beno tala, awa kele na ntwenya me vwanda awa, mwana ya bakala, ya mundele, yina me vwanda awa ke tala munu. Nsatu ya mudindu na kati ya ntima ya yandi. Mu me zabaka yandi ata fyoti ve, kasi nge ke na kusosaka mbotika ya Mpeve-Santu. Kieleka, nge. Nge ke kwikila yawu? Nge ke kuzwa Yawu. Nge ke kwikila yawu, ntwenya ya bakala? Mbote mingi, nge lenda kuzwa Yawu kana nge ke kwikila yawu.

167 Awa kele na mwa kento mosi kuna na manima. Yandi kele na mpasi. Ya kele diboko ya yandi ya kikento. Ya bukanaka Yandi. Ya kele na dikolo na zulu ya yawu, diboko ya kikento. Na diboko ya yandi ya kibakala, yandi kele na kidi-kidi mpe rhumatisme. Yandi ke kondwa yawu. Mama Council, nge ke kwikila na ntima ya nge ya muvimba? Nge ke kwikila ti Nzambi ke belusa. . . Nge me beluka. Yesu Klisto me belusa nge.

168 Mu me monaka ntete ve kento yayi to me kuwaka na yandi, na luzingu ya munu. Yehowa zaba ti ya kele kieleka. Amen.

169 Awa kele na mama mosi ya ntwenya, ya ndombe yina me vwanda awa. Yandi ke na mpasi ya minianga, bima mingi. Kima mosi, nge kele na mpasi na meso ya nge. Ve samu ti nge me lwata maneti; kasi meso ya nge ke na kukuma yimbi, na mutindu nyonso. Nge ke na arthritis. Kana ya kele kieleka, ningisa diboko ya nge. Nge ke na mpasi na ntulu ya nge. Ya kieleka? Ningisa diboko ya nge. Nge ke na mpasi na estomac. Kana ya kele kieleka, ningisa diboko ya nge. Nge ke kwikila ti Yandi ke belusa nge? Nge ke kwikila ti Nzambi lenda tuba na munu nani nge kele? Edna Gerald. Nge ke kwikila yawu na ntima ya nge ya muvimba, kwikila yawu, mpe nge lenda kuzwa kubeluka ya nge. Amen.

170 Beno ke kwikila ti Yandi kele mutindu mosi mazono, bubu yayi, mpe kukonda nsuka?

171 Wapi mutindu samu na kento yayi me vwanda awa na nsuka, na ndonga ya zole awa, yina ke tala kaka na munu? Yandi kele na mpasi na makulu ya yandi. Nge ke kwikila ti Nzambi ke belusa makulu ya nge? Kana nge ke kwikila, telemisa diboko ya nge. Mu zaba yandi ve, mu me monaka yandi ata fyoti ve.

172 Wapi mutindu samu na mama yina me vwanda pene-pene ya yandi? Nge . . . Tala lweka yayi, mpangi-kento. Nge ke kwikila ti mu kele kisadi ya Nzambi, na ntima ya nge ya muvimba? Nge kele na nevrte ke na kukwamisa nge. Kana ya kele kieleka, ningisa diboko ya nge. Ntangu yayi nge lenda beluka.

173 Mama yina me vwanda pene-pene ya yandi, nge ke kwikila yawu, na ntima ya nge ya muvimba? Nge ke na mpasi, mpe. Nge ke kwikila ti Nzambi lenda tuba na munu yina kele mpasi ya nge? Mpasi ya ba-rein. Kana ya kele kieleka, ningisa diboko ya nge.

174 Mama yina me vwanda pene-pene ya yandi, nge ke kwikila? Nge ke na mpasi ya kudasuka, mpe na meso ya nge. Kana ya kele kieleka, ningisa diboko ya nge.

175 Mama yina me vwanda pene-pene ya yandi, nge ke kwikila, mpangi-kento? Nge me fikama na kivudi. Nge ke na mpasi ya estomac, ya ke cancer na estomac. Nge ke kwikila ti Nzambi me belusa nge? Amen.

176 Nge ke kwikila? Ti meso ya nge lenda zibuka mpe kukwikila ti Yandi kele Mwana ya Nzambi? Na yina, kana nge sala yawu, telema mpe ndima Yandi, mpe kwikila yawu na ntima ya nge ya muvimba, ti Yandi kele mutindu mosi mazono, bubu yayi, mpe kukonda nsuka. "O Yesu, Nge Mwana ya David, wila munu mawa!"

Kuluta munu ve, O Mvulusi ya ngemba,
 Kuwa kudila ya munu;
 Na yina Nge ke bokila bayankaka,
 Kuluta munu ve.

Nge Yinto ya ngolo ya munu nyonso,

Kulutila luzingu na munu,
Nani mu kele na zulu ya ntoto na ngaanda ya
Nge?

To nani na Mazulu kasi Nge?

¹⁷⁷ Yinki me salama? Lukwikilu ya beno, kaka mutindu mulombi ya kufwa meso yina, bokilaka Yandi na kisalu. Amen. Beno ke kwikila yawu? Oh, ya kele dyaka ve na nsatu ya kusala nzila ya kubeluka ya nzutu. Bantu yikwa ke kwikila ti beno me beluka, na mutindu nyonso? Beno telemisa maboko ya beno, beno kumisa Yandi! Amen. Beno me beluka.

¹⁷⁸ Yesu Klisto kele na kati-kati ya beto, Yandi yina mosi tambulaka na Jéricho, yina zabaka Zachée na nkumbu, yina zabaka Bartimée. Mfumu Yesu mosi, na mutindu ya Mpeve-Santu, kele awa, na nkokila yayi, na kusalaka bima mosi yina Yandi salaka, kukondwa kubwa na kusiamisaka ti Yandi kele mutindu mosi mazono, bubu yayi, mpe kukonda nsuka. Beno bika ve ba-credo, mpe ba-théologie, mpe madidi, kukanga beno. Beno kele na kati ya Mvwandulu ya Yesu Klisto, Yina me monisama na kati-kati ya beno. Amen. Mu ke kwikila yawu na ntima ya munu ya muvimba. Amen.

¹⁷⁹ Beno ndima kubeluka ya beno, beno tuba, “Lukumu na Mfumu! Mu me ndima yawu.”

¹⁸⁰ Beto yimba balukumu na Yandi kuna. “Mu zola Yandi, mu zola Yandi.” Beno zola Yandi? “Samu Yandi zolaka munu ntete.” Beno zola Yandi?

Mu zola Yandi,

¹⁸¹ Beno sambila Yandi ntangu yayi na kati ya Mvwandulu ya Yandi. Beno zaba ti Yandi fwana vwanda awa.

. . . zola Yandi
Samu Yandi zolaka munu ntete
Mpe futaka mpulusu ya munu

¹⁸² Ya kele kubeluka, mpe. Ya kele ndambu ya mpulusu ya beno. Wapi kisika beno ke sala yawu? Na yinti ya Calvaire—ya Calvaire. Bantima ya beto nyonso!

Mu zola Yandi, mu zola Yandi

Kieleka ya zola kutuba yawu. Beno sambila Yandi!

Samu Yandi zolaka munu ntete
Mpe futaka mpulusu ya munu
Na yinti ya Calvaire.

¹⁸³ Oh, beno zola Yandi ve? Beno pesana maboko na muntu, na kutubaka, “Lukumu na Mfumu!” Beno zola mosi na yankaka, beno zola Yandi. Beno baluka kaka mpe beno pesa mbote na muntu, na kutubaka, “Lukumu na Mfumu! Lukumu na Mfumu! Beto kele na kyese na kuvwanda awa, mpangi, na kyese ti beto

kele na kati ya Mvwandulu ya Mfumu Yesu.” Amen. Amen. Mbote mingi! Oh!

184 Paul tubaka, “Kana mu yimba, mu ke yimba na Kimpeve.” Beto sambila na Mpeve, dyaka. Beto yimba na Kimpeve.

Mu zola Yandi, mu zola Yandi, (Alleluia!)
 Samu Yandi zolaka munu ntete
 Mpe futaka mpulusu ya munu
 Na yinti ya Calvaire.

185 Oh, beno zola Yandi ve? Yandi kele mbote ve? Beno yimba!

Oh, mbote, mbote, Yesu kele na munu,
 Konseye, Ntinu ya Ngemba, Nzambi ya Ngolo
 nyonso kele Yandi;
 Oh, yandi me vulusa munu, ke keba munu na
 masumu mpe nsoni nyonso,
 Mbote kele Mukudi ya munu, lukumu na
 Nkumbu ya Yandi!

Oh, mbote, mbote, Yesu kele na munu,
 Yandi kele Konseye, Ntinu ya Ngemba, Nzambi
 ya Ngolo nyonso kele Yandi;
 Yandi me vulusa munu, oh, ke keba munu na
 masumu mpe nsoni nyonso,
 Oh, Mukudi ya munu kele mbote, mu ke
 kumisa Nkumbu ya Yandi!

186 Yinki lendaka salama ntangu yayi na Mvwandulu ya Nzambi, mutindu yayi?

Mu zimbanaka mbala mosi, ntangu yayi ba me
 kuzwa munu, na kimpwanza ya lufundusu,
 Yesu pesaka kimpwanza mpe mpulusu ya
 kufuluka;
 Yandi me vulusa munu, ke keba munu na
 masumu mpe nsoni nyonso,
 Oh, Mukudi ya munu kele mbote, mu ke
 kumisa Nkumbu ya Yandi!

Oh, beto yimba yawu mutindu yawu zola kutuba samu na beto!

Mbote, mbote, Yesu kele samu na munu,
 Konseye, Ntinu ya Ngemba, Nzambi ya Ngolo
 nyonso kele Yandi;
 Oh, yandi me vulusa munu, ke keba munu, oh,
 na masumu mpe nsoni nyonso,
 Oh, Mukudi ya munu kele mbote, mu ke
 kumisa Nkumbu ya Yandi!

187 Oh, ya ke sala kima mosi ve na beno, ya ke sukula beno kuna, na kati? Kubundana, oh, wapi nsatu yayi! Mu lendaka sobisa yayi ve samu na mbongo nyonso yina beno lendaka kukutika,

bima nyonso yankaka. Beno losa yawu ntama, kasi beno pesa munu Yesu. Oh, la la! Yinga, tata. Kubundana!

¹⁸⁸ Oh, ya ke kitoko mingi na kutambula na nzila yayi ya kizyeti, me yekama na Diboko ya seko, kuzaba ti Yandi yayi! Oh, zola na kutalana ya ntete, kima na kati ya beto yina ke bokilaka! Oh, kima mutindu . . . mutindu ti ba me katula kitapu na dibulu ya artesien, ke basisa kaka maza; mpe mingi yina ya ke basisa, madidi mpe madidi mingi ya ke kuma. Amen. Oh, Yandi kele mbote! Yandi kele yawu ve? Mu zola Yandi. Beno ve? Oh, la la!

¹⁸⁹ Beno zola ve mosi na yankaka? Ntangu yayi beno nyonso ba-Methodiste beno pesana mbote na ba-Pentecotiste, mpe beno ba-Baptiste, mpe beno vwanda kaka kieleka na lutondo. Kana beno lenda ve kusala yawu, beno zola Yandi ve. Ya kele kieleka. Samu ti, bawu zola Yandi, beno zola Yandi; Yandi bakaka beno na mutindu ya beno ya kuswaswana, Yandi salaka yina yankaka, na yina beto wisana ntangu yayi. Oh, Yandi kele mbote ve? Beto ke kwikila yawu na bantima ya beto nyonso.

¹⁹⁰ Oh, beto yimba dyaka yawu, nkunga yayi ya mbote ya ntama ya dibuundu, “Mu zola Yandi, mu zola Yandi.”

¹⁹¹ Mu lenda kaka ve kuzwa mingi ya kutuba yawu, samu ti Yandi zolaka munu ntete. Yandi zolaka munu, munu muntu ya mputu, na luzolo ya munu kufwa meso, muntu ya luzolo ya disumu, mwana ya bakala ya munwi-malafu, na bakanivo, mpe Yandi kulumukaka na lemvo ya Yandi. Mu vwandaka ve na kima ya kusala na yawu. Yandi solaka munu. Yinga. Wapi mutindu ya lenda vwanda? Wapi mutindu grateron lenda soba na blé? Ya ke lomba ngolo ya Nzambi. Amen. Mu zola Yandi. Oh, mu—mu ke kumitala mutindu musambidi malu-malu yayi, munu mosi. Mu—mu—mu ke na kutala mbote.

¹⁹² Mu zaba ti Yandi kele awa. Ya kele Yandi. Yandi silaka yawu. Yandi—Yandi kele awa na kati-kati ya beto. Mutindu mu zola Yandi! Yandi kele mbote mingi. Ya ke sala ti beno kuwa mbote na kuzaba ti beto fwana banza yawu ve. Yandi yayi awa, ke kukitalisa Yandi mosi na kati ya Ndinga, mutindu Yandi ke salaka ntangu nyonso, yina ke salaka yawu Yandi; ya kele credo mosi ve, mwa kima ya luvunu ve; kasi Nzambi ya moyo Yandi mosi. Wapi mutindu Yandi kukitalisaka Yandi mosi? Kuna na Sodome ve, kasi na Abraham; mpe ntangu yayi na Nkuna ya Abraham, na manima ya Yandi, ke lakisa ti beto kele Nkuna ya Abraham. Amen. Oh, la la! Mu ke na kutala kieleka mbote, ntangu yayi.

Mu zola Yandi, (Oh, wapi mutindu ya mvula ya
lusakumunu!) Mu zola Yandi
Samu Yandi . . .

Beno banza kaka; ntete beno zola Yandi, Yandi zolaka beno!

¹⁹³ Mfumu Yesu, pesa kubeluka ya nzutu ya bantu yayi, Tata, ti bawu beluka, mosi na mosi ya bawu. Na Nkumbu ya Yesu Klisto, mu ke sambila, Mfumu, samu na nkembo ya Nge. Amen.

. . . Yinti ya Calvaire.

¹⁹⁴ Oh, beto kulumusa bayintu ya beto ntangu yayi, na lembami, na malembe. Beno zaba, beto kele kaka bana, na mutindu nyonso. Beto kele bana ya Nzambi. Beno me monaka ntete mutindu mwana ke vwandaka na kipwanza pene-pene ya bibuti ya yandi? Bibuti ya yandi ke na kutala yandi mbote, beno me mona. Beto yimba yawu na kati ya yinwa.

¹⁹⁵ Kaka kumona Yandi ya kutelama awa, Dikunzi ya Tiya ya nene! Yandi tubaka, “Mu me katuka na Nzambi; mu ke kwenda na Nzambi.” Yandi vwandaka Logos yina vwandaka na Moise na ntoto ya kuyuma, Dikunzi ya Tiya. Yandi kufwaka na Calvaire, yumbukaka dyaka. Mpe ntangu Saul vwandaka na nzila ya yandi kuna na Damas, Dikunzi mosi yango ya Tiya losaka yandi na ntoto; yandi tubaka, “Nani Nge kele, Mfumu?”

Yandi tubaka, “Mu kele Yesu.”

¹⁹⁶ Yandi katukaka na Nzambi; Yandi kwendaka na Nzambi. Kuzabanaka na beto na nzila ya kidimbu ya science, na nzila ya kidimbu ya dibuundu, na nzila ya nyonso.

Mu . . .

Na kunataka kima ya Yandi mosi, na kutubaka Ndinga ya Yandi. Yandi kele mutendudi. [Mpangi Branham ke yimba na kati ya yinwa *Mu Zola Yandi—Mu.*]

¹⁹⁷ Ya ke vwanda ve ntangu mosi ya mbote samu na Yandi na kukwiza na ntangu yayi, ke tala bisika nyonso mpe ke mona muntu nyonso kusoba, ke kwenda? Yandi ke sala yawu kilumbu mosi.

¹⁹⁸ Ntangu yayi na bayintu ya beto ya kukulumusa, na malembe nyonso. [Mpangi Branham ke na kuyimba na kati ya yinwa *Mu Zola Yandi—Mu.*]

¹⁹⁹ Beno bambuka moyo, balukutakanu na suka. Kana beno kele nzenza awa, mpe beno kele ve na dibuundu; ba-pasteur yayi ya mbote, ba ke kwikilaka nsangu ya mbote ya mutindu mosi to ba zolaka ve kubokila munu awa. Ba ke bokila beno na kukwenda na yinzo-Nzambi ya bawu. Beno kuzwa lukutakanu ya mbote mbasi, mpimpa ya mbote ya kupema na mpimpa yayi, mpe na manima beno vutuka mbasi na manima ya midi samu na lukutakanu ya kubeluka ya nzutu.

²⁰⁰ Mbote mingi. Nzambi sakumuna nge, mpangi ya bakala. 🐦

64-0620E Nzambi Me Kubika Mwana-dimeme
Municipal Auditorium
Topeka, Kansas U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org